



Broj: 02-04-656/21
Datum, 04.05.2021. godine

ZAPISNIK sa 6. redovne sjednice 7. saziva Općinskog vijeća Doboj Istok

Šesta redovna sjednica 7. saziva Općinskog vijeća održana je dana 29.04.2021. godine u zgradi općine Doboj Istok u Klokotnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, te predstavnik RTV TK.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvaženi načelnice, kolegice i kolege vijećnici, predstavnici medija esalamu alejkum i dobar dan. Otvaram 6. redovnu sjednicu 7. saziva Općinskog vijeća Doboj Istok. Zamolio bih tehničkog sekretara da utvrdi broj prisutnih na današnjoj sjednici. Prisutno je svih 17 vijećnika, što znači da imamo kvorum i možemo nastaviti sa daljim tokom sjednice.“

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste Zapisnik sa 5. redovne sjednice VII saziva Općinskog vijeća. Otvaram diskusiju ako neko ima primjedbu. Nema. Ko je za Zapisnik?“

Glasanje: ZA – 17, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ako ima neko pripremljeno vijećničko pitanje ili inicijativu od vijećnika, izvolite.“

Emira Karić, predsjednica kluba vijećnika SDP: „Esalamu alejkum i dobar dan. Vijećničko pitanje. Budući da vijećnici u Općinskom vijeću Doboj Istok nemaju „tu privilegiju“ da im se objasne određena konta u urneku budžeta općine Doboj Istok tražim pismeni odgovor na sljedeća pitanja: Na šta je utrošen (konkretno, precizno i tačno) konto 732112, 732114, 733111, 821211, 821111, 821614? Odgovore na pitanja tražim u pisanoj formi i to u poslovnički predviđenom roku.“

Kemal Skopljak, vijećnik BPS – Sefer Halilović: „Želim da poselamim i pozdravim sve prisutne. Ja imam jedno vijećničko pitanje. Molim vas da mi odgovorite:

- Koliko su plaćene izgrađene tribine na stadionu NK „Mladost“ u Brijesnici Velikoj?
- Kolika je bila projektovana vrijednost?
- Hoće li se nastaviti izgradnja?

U onakvom stanju u kojem su trenutno te tribine ne mogu biti u upotrebi i ne smiju biti u upotrebi.

Obrazloženje: Puno građana Mjesne zajednice je pitalo upravu kluba na koje nisu znali dati odgovor. “

Senada Džanić, predsjednica kluba vijećnika SBB – BPS – S BiH: „ Predsjedavajući, zamjenice, kolegice i kolege vijećnici, načelnice sa saradnicima, predstavnici medija esalamu alejkum i dobar dan. Ja sam prošli put podsjetila na Poslovnik o radu i nikad nisam dobila odgovore na vijećnička pitanja sa prethodnih sjednica i ja ću ih ponoviti ponovo kako bi ih dali na daljne postupanje. Vijećničko pitanje upućeno 26.01. glasi: Da li će se uskoro pristupiti rješavanju zamjene sijalica rasvjete na području općine Doboj Istok LED rasvjetom, odnosno hoće li se konačno riješiti neispravne sijalice koje ne rade? Također 26.01. upućeno je vijećničko pitanje: Da li načelnik sa svojim saradnicima može da riješi problem parking mjesta za građane koji dolaze u ovu ustanovu za usluge koje su im potrebne? 25.03. uputila sam vijećničko pitanje: Zašto načelnik ne nastupi kod Elektroprivrede BiH – Elektrodistribucija Tuzla zaduženoj za područje općine Doboj Istok da se završi rekonstrukcija niskonaponske mreže i drugih aktivnosti na poboljšanju bezbjednosti snabdijevanja stanovništva električnom energijom? Upravo sam dobila neke odgovore na pitanja. 25.03. postavljeno je pitanje: Da li je Služba za urbanizam i prostorno planiranje provela obilježavanje na terenu zemljišta koje je zamjenom prešlo u vlasništvo Općine Doboj Istok? Iako sam pripremila vijećnička pitanja, nisam znala da ima odgovor, pa nisam htjela da ih iznesem. Imam dvije vijećničke inicijative.

1. U prethodnom sazivu Općinskog vijeća postavljala sam vezano za ovu problematiku vijećničku inicijativu i sada sam ju izmijenila obzirom na obrazloženje tada i mislim da je sada prihvatljiva. Podnosim vijećničku inicijativu da se pronade najpovoljniji ponuđač za izradu projekta za trajno rješavanje puta za Hodžiće u naselju Hodžići. U više navrata, i u pravilu u izbornim godinama, pomenuta dionica puta imala je sanacione zahvate. Za te poslove izdvojena su značajna sredstva, ali rezultat je da su popravke kratkotrajne što dokazuje i stanje u kakvom je trenutno. Mišljenje ljudi od struke za tu vrstu poslova je da je potrebna izrada projekta stručnjaka iz te oblasti da bi se ovaj problem riješio. Po mišljenju istih način na koji se do sada rješavao za posljedice će imati pogoršanje stanja proširenjem klizišta i ugrožavanjem veće dionice puta te poskupljenju svake popravke. S toga smatram da bi bilo ispravno problem rješavati korak po korak. Izrada kvalitetnog projekta od struke iz te oblasti sa detaljnim opisom potrebnih radnji za trajno rješavanje ovog problema bilo bi dugoročno gledano, isplativo jeftinije, a put ka trajnom rješenju jednog od najvećih problema građana ovog dijela Stanić Rijeke, jer u pitanju je jedan od osnovnih uslova za život putne komunikacije.

2. Sljedeća vijećnička inicijativa je da se konačno pristupi rješavanju izrade pješačkog trotoara pored Magistralnog puta u dionici od semafora na ulazu u Klokočnicu do izrađenih trotoara u Brijesnici Velikoj, u ulici Stara cesta u Klokočnici i pored magistralnog puta u Stanić Rijeci, te obilježavanje pješačkog prelaza na magistralnom putu u Stanić Rijeci.

Obrazloženje: U proteklom periodu u više navrata pred Općinskim vijećem Doboj Istok bila je predlagana slična inicijativa. Razlog njenog odbijanja je najvećim dijelom pitanje nadležnosti (tačno je da ona nije u nadležnosti općine, nego Federalne direkcije za puteve). Međutim, realnost naše svakodnevnice iziskuje od nas, predstavnika građana u vlasti i same izvršne vlasti da se aktivno pristupi traženju rešenja za ovaj problem. Raniji događaji u Stanić Rijeci i nedavni u Klokočnici koji su se desili i u kojima su naši sugrađani izgubili živote ne mogu se više nazivati opomenom već posljedicom lošeg pristupa ovom problemu. Na žalost, ovo nije prvi ovakav događaj, a lako se može desiti da ne bude ni posljednji. Roditelji djece koja pohađaju škole u Klokočnici i Stanić Rijeci dovode djecu u školu i sačekuju ih poslije škole. Ovim nije obezbijedena njihova sigurnost u kretanju ovim dionicama već su ugroženi i jedni i drugi. Nadležnost nad izgradnjom trotoara jeste na Federalnoj direkciji za puteve, ali nije stavljena zabrana da lokalna zajednica, odnosno svi mi skupa pristupimo rješavanju tog problema pa i u saradnji sa nadležnom institucijom u nekom obliku. Ako analiziramo period u proteklih nekoliko godina nije teško primjetiti da se naša lokalna vlast jako posvetila izgradnji lokalnih puteva prema dijelovima opštine u kojima su izgrađeni razni objekti i vikendice. Ne može se porediti važnost tih puteva kojima se povremeno saobraća i trotoara pored Magistralnog puta kojim se svakodnevno moraju kretati pješaci. Što se tiče pješačkog prelaza u Stanić Rijeci već dugo se isti ne vidi, a s obzirom da svakodnevno veliki broj građana prelazi magistralu, kao i učenici na putu

do škole, a kako nema obilježja da se u blizini nalazi škola, niti znak ograničenja brzine, nesavjesni vozači na tom dijelu puta koji je u raskrsnici, u naseljenom mjestu, gdje je velika frekvencija, voze velikim brzinama, ne zaustavljaju se kako bi propustili učenike preko pješačkog prelaza, što u konačnici ima za posljedicu da naši učenici i građani stoje nekada deset i više minuta kako bi prešli magistralni put na drugu stranu obzirom na opterećenost puta saobraćajem. S toga smatram da imamo odgovornost i dužnost da se pristupi rješavanju ovog problema na način da načelnik kontaktira odgovorne u Federalnoj direkciji za puteve, upozna ih sa problemom i da zajedno donesemo najbolje rešenje za ovaj veliki problem.”

Kemal Bratić, općinski načelnik: „Predsjedavajući, zamjenice, uvaženi vijećnici i vijećnice esalamu alejkum. Drago mi je da smo danas svi prisutni i da su oni koji su bili bolesni, haste, da su ozdravili i da su nakon dužeg perioda u mogućnosti da prisustvuju Općinskom vijeću. Ja želim da tako i ostane i da ne bude nekih većih posljedica. Ja ću se osvrnuti na jedan dio inicijative vezano za trotoar Klokočnica – Brijesnica. Imam čvrsta obećanja da će do kraja ove godine taj projekat biti riješen, s tim da nema tehničkih mogućnosti da on bude od semafora preko Samarića nego će ići tamo starom cestom do spajanja sa cestom za Brijesnicu Veliku. Naravno da će i ovaj pješački prelaz biti obilježen, mi smo poslali dopis i podnijeli smo inicijativu ovdje gdje nam je nastradao nedavno jedan građanin za obilježavanje pješačkog prelaza i izgradnje male ćuprije od strane vodotoka, ne ovamo od magistrale, kako bi naši učenici i građani mogli prelaziti i izbjeći tu opasnost. Vijećnica je rekla zbog nesavjesti vozača, prvenstveni razlog je to, ali da su svi vozači savjesni ne bi nam ni trebali ni semafor, ni pješački prelaz, ni pješačka staza, ni bilo šta drugo. Nisam razumio dio inicijative da li se govori o trotoarima od magistrale prema školi ili o trotoaru od raskrsnice prema Doboju, odnosno prema Doboju Istoku, prema Klokočnici. Znači nisam taj dio inicijative razumio. Po onome što ja znam je veoma mala gravitacija i sa jedne i sa druge strane i veća je gravitacija kada se ulazi u naselje od magistrale do područne škole u Stanić Rijeci, pa da se pojasni taj dio inicijative.“

Senada Džanić, predsjednica kluba vijećnika SBB – BPS – SBiH: „Ako sam ja vas načelniče dobro razumjela pitate me vezano za trotoare u Stanić Rijeci. S obzirom na to da pješački prelaz koji je urađen i već sam rekla da se ne vidi trag tog pješačkog prelaza na asfaltu, a ranije sam govorila da mi nemamo obilježja da je u blizini škola i da imamo tu dva smrtna slučaja. Kada je u pitanju Stanić Rijeka najveća frekvencija zbog trgovine ... Ja ću zamoliti predsjedavajućeg za ova dobacivanja, jer osjećam se neprijatno kada neko dobacuje ovako s mjesta. Znači dole se nalazi i jedna od velikih tekstilnih firmi i djeca koja dolaze u područnu školu, a jako puno je to djece iz Polja koja prelaze tu magistralu svakodnevno, osim toga što su roditelji prinuđeni da čekaju sa njima da ih prevedu preko magistrale, pa traže načine, jer je i to otežano. Činjenica je da se niko od nas ne bi osjećao sigurno da mu dijete tog uzrasta prelazi magistralni put bez ikakvog obilježja. Što se tiče trotoara gdje god krenete u Stanić Rijeci da radite trotoare nećete pogriješiti. Sada samo da uradimo proritete, a prioritet je upravo taj dole magistralni put, jer kretanje je tu prema obje autobuske stanice, pa se i građani i učenici kreću magistralnim putem bez trotoara. Inicijativa se odnosi prvenstveno na magistralni put i ako treba reći ću vam tamo prema Humićima, znači kompletno do izlaza gdje stoji tabla Republika Srpska.“

Selmin Karić, predsjedavajući Općinskog vijeća: „Ima li još prijavljenih? Nema. Znači imali smo dvije inicijative od kolegice Senade. Prva inicijativa je vezana za izradu projekta za trajno rješavanje puta za Hodžiće u naselju Hodžići. Kolegica je objasnila da ne čitam ponovo i dajem na izjašnjenje. Ko je za ovu inicijativu?

Glasanje: ZA – 6, PROTIV – 0, SUZDRŽANIH – 11.

Znači inicijativa nije dobila potrebnu većinu.

Druga inicijativa je vezana za rješavanje izrade pješačkog trotoara pored magistralnog puta u dionici od semafora na ulazu u Klokočnicu do izrađenih trotoara u Brijesnici Velikoj, u ulici

Stara cesta u Klokočnici i pored magistralnog puta u Stanić Rijeci, te obilježavanje pješačkog prelaza na magistralnom putu u Stanić Rijeci. Kolegica je objasnila i ovu inicijativu dajem na izjašnjavanje. Ko je za ovu inicijativu?

*Glasanje: ZA – 6, PROTIV – 0, SUZDRŽANIH – 11.
Znači ni ova inicijativa nije dobila potrebnu većinu.*

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu je predviđen sljedeći dnevni red:

- 1. Razmatranje i usvajanje prijedloga Odluke o izmjeni Poslovnika o radu Općinskog vijeća Doboj Istok,*
- 2. Razmatranje i usvajanje Odluke o odgađanju izbora za organe mjesnih zajednica na području općine Doboj Istok*
- 3. Razmatranje i usvajanje prijedloga Odluke o razrješenju predsjednika i člana Općinske izborne komisije Doboj Istok,*
- 4. Razmatranje i usvajanje prijedloga Odluke o imenovanju predsjednika i člana Općinske izborne komisije Doboj Istok,*
- 5. Razmatranje i usvajanje Izvještaja o izvršenju budžeta u općini Doboj Istok za 2020. godinu*
- 6. Razmatranje i usvajanje Izvještaja o utrošku sredstava budžetske rezerve za 2020. godinu*
- 7. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2020. godinu*
- 8. Razmatranje i usvajanje Izvještaja o radu JZU Dom zdravlja Doboj Istok za 2020. godinu*
- 9. Razmatranje i usvajanje Izvještaja o radu JU Centar za socijalni rad Doboj Istok za 2020. godinu*
- 10. Razmatranje i usvajanje Izvještaja o radu Općinske izborne komisije Doboj Istok za 2020. godinu*
- 11. Razmatranje i usvajanje prijedloga Rješenja o konačnom imenovanju predsjednika i članova Upravnog odbora Javne ustanove za predškolski odgoj i obrazovanje „ Dječija radost“ Doboj Istok*
- 12. Razmatranje i usvajanje prijedloga Rješenja o konačnom imenovanju predsjednika i članova Upravnog odbora Javne ustanove « Centar za socijalni rad Doboj Istok »*
- 13. Razmatranje i usvajanje prijedloga Rješenja o prijedlogu za imenovanje članova Nadzornog odbora Javnog komunalnog preduzeća „Čisto“ doo Doboj Istok*
- 14. Razmatranje i usvajanje prijedloga Rješenja o prijedlogu za imenovanje članova Nadzornog odbora Javnog preduzeća „Veterinarska stanica“ doo Doboj Istok*

Dnevni red dajem na diskusiju. Nema prijavljenih. Ko je za ovakav dnevni red?

Glasanje: ZA – 17, PROTIV – 0, SUZDRŽANIH – 0.

REALIZACIJA DNEVNOG REDA

Ad. 1. Razmatranje i usvajanje prijedloga Odluke o izmjeni Poslovnika o radu Općinskog vijeća Doboj Istok

Selmin Karić, predsjedavajući Općinskog vijeća: „Tačku dajem na diskusiju. Ovdje imamo jedan amandman vezano za ovaj prijedlog. Amandman sam podnio ja, a koji glasi: U prijedlogu Odluke o izmjeni Poslovnika o radu Općinskog vijeća Doboj Istok u članu 1. iza stava 3. dodaje se novi stav 4. a stav 4. postaje stav 5. koji glasi:

„Principi koji su propisani u stavu 3. ovog člana važe i za Kolegij i radna tijela Općinskog vijeća.“

Obrazloženje: Obzirom da se nejasnoće u vezi održavanja sjednica Općinskog vijeća elektronskim putem odnose i na održavanje sjednica Kolegija i radnih tijela Općinskog vijeća ovim amandmanom želim otkloniti i te nejasnoće. Ovaj amandman postaje sastavni dio Odluke obzirom da sam ja predlažem. Tačku dajem na diskusiju.“

Senada Džanić, predsjednica kluba vijećnika SBB – BPS – SBiH: „Ja se izvinjavam ne odnosi se na ovu tačku, ali ja ću biti primorana napustiti sjednicu vijeća ako svi ne budu nosili maske. Radim u javnoj ustanovi i stvarno ne mogu biti u prostoriji gdje se sjedi bez maske.“

Selmin Karić, predsjedavajući Općinskog vijeća: „Ima li prijavljenih vezano za ovu tačku. Nema. Dajem na glasanje prijedlog Odluke sa amandmanom. Ko je za?

Glasanje: ZA – 15, PROTIV – 0, SUZDRŽANIH – 2.

Odluka je dobila potrebnu većinu.“

Ad. 2. Razmatranje i usvajanje prijedloga Odluke o odgađanju izbora za organe mjesnih zajednica na području općine Doboj Istok.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „ Ja itekako pozdravljam ovu Odluku, zapravo slažem se sa njom u potpunosti. Odluka je dobra, jer treba zaista poštovati mjere, odnosno prilagoditi se tim epidemiološkim mjerama i situacijama, a ovo nije neka hitna stvar. Međutim pojavili su se određeni problemi. Ovo što ću sada ja da iznesem trebao je biti amandman, ali ja sam za te probleme čula juče. Pitala sam na Kolegiju vezano za procedure, mislim da to ima u zapisniku sa Kolegija i Omer je rekao da procedure ostaju iste u Brijesnici Maloj do četvrtka danas do 12 sati. Mi smo sve uradili kako treba, predsjednica sam izborne komisije i mi ćemo danas to ždrijebanje da uradimo, ali šta je sa ostalim mjesnim zajednicama. Ja koliko znam postoje mjesne zajednice kojim se do danas procedure neće ispoštovati i samim tim sve to pada u vodu. Tražim da se oglasi predsjednik Općinske izborne komisije, a imam i prijedlog da načelnik uloži amandman da u članu 2. ove Odluke stoji da je novi termin za održavanje izbora i procedura vezanih za održavanje izbora. Onda bi dali prostora i ostalim mjesnim zajednicama, jer ovako nije isti aršin i onda se po meni u ostalim mjesnim zajednicama i ne trebaju održati zbog nepoštivanja procedura, a onda to nije u redu, ni dobro. Znači imamo rješenje da načelnik uloži amandman na poglavlje 2. gdje bi dodao i procedure vezane za održavanje, tako bi mi u Brijesnici Maloj danas uradili posao i neka bude završen, a ostalima pružili mogućnost da odrade kako treba.“

Izet Hodžić, zamjenik predsjedavajućeg Općinskog vijeća: „ Poštovani predsjedavajući, poštovane kolegice i kolege općinski vijećnici, načelnice sa saradnicima, poštovani gosti želim sve iskreno da vas poselamim i pozdravim. Bio sam prisutan na Kolegiju Općinskog vijeća kada je raspravljano po ovoj tački dnevnog reda, odnosno da se ova tačka uvrsti na dnevni red. Ja nisam razumio baš u ovakvom obliku pravnika, kako je kolegica objasnila, ja sam razumio da je pravnik rekao da se kompletna procedura odgađa do daljnjeg i da ćemo mi na nekoj od narednih sjednica donijeti novu odluku o raspisivanju izbora u mjesnim zajednicama. Mi sa ovom odlukom poništavamo Odluku o raspisivanju izbora u mjesnim zajednicama koju smo donijeli na prethodnoj sjednici. Ja sam razumio Omera da se kompletna procedura poništava i odgađa do daljnjeg. Kada se stvore uslovi i kada bude epidemiološka situacija na području općine Doboj Istok zadovoljavajuća da će Općinsko vijeće donijeti odluku i da će se krenuti u realizaciju tih izbora iz početka u onakvom obliku kako je predviđeno.“

Haris Sinanović, vijećnik SDP: „ Poštovani predsjedavajući, uvaženi vijećnici, predstavnici medija želim da vas pozdravim. Dosta je stvari rekla kolegica Emira i zamjenik

predsjedavajućeg. Međutim evo ja par dana pokušavam ovdje u Općini da dobijem neke informacije vezano za izbore u mjesnim zajednicama. Volio bih da me neko demantuje, izbori su već davno bili raspisani i trebale su se formirati izborne komisije u mjesnim zajednicama. Koliko ja znam što se tiče mjesne zajednice kojoj ja pripadam, Stanić Rijeke, ništa nije rađeno povodom toga. Znači nije imenovana izborna komisija niti je bilo šta rađeno. Da bi dokazao to išao sam do mjesne zajednice da vidim da nije istaknuto na mjesnoj zajednici i onda bi sve bilo ok. Međutim gore pred ulazom u mjesnu zajednicu imaju znakovi da u te prostorije niko nije ušao već dugo vremena, jer nalazi se tu smeće, da izvinete, ptičija govna, na ulazu kroz staklo zaključanih vrata vidi se vreća smeća i paučina na vratima. Samo bih želio da se potvrdi ovo što je zamjenik predsjedavajućeg rekao da se kompletne procedure odgađaju, a odnosi se to i na predaju lista kandidata.“

Emira Karić, predsjednica kluba vijećnika SDP: „Kada se prihvatim neke funkcije, a u ovom slučaju predsjednice izborne komisije, ja uvijek dotjeram mak na konac i razriješim određene stvari. Našeg sekretara mjesne zajednice u nekoliko navrata zovem i šaljem poruke da utančinimo do detalja te stvari. Sekretara sam zvala i on je zvao, koliko ja znam iz tih poruka, sekretara Općinskog vijeća koji mu je rekao da procedure završavaju u četvrtak u 12 sati. Ja bih voljela da se radi korektnosti naš sekretar mjesne zajednice ovdje obrati i da Omer potvrdi to i da jednostavno vidimo da ja ne govorim nešto što je bez veze, nego govorim ono što je utemeljeno u nekim mojim radnjama i nekim razgovorima. Moguće je da Amir nije razumio našeg sekretara Općine, samo se to moglo dogoditi.“

Izet Hodžić, zamjenik predsjedavajućeg Općinskog vijeća: „Ne vidim potrebu za nekom posebnom nervozom. Imamo zapisnik sa Kolegija Općinskog vijeća gdje je naš pravnik pojasnio. Ne želim ja da kažem da neko drugi ne može imati različito mišljenje. Znači pitali smo i to je logičan slijed događaja, jer možda će se izbori održati u avgustu, septembru ili okrobru i nemojte da oko svakog pitanja nešto politizujemo. Ovdje fino stoji, a čini mi se baš na vaše pitanje, da je sekretar pravnik rekao da treba čekati dan kada su izbori, jer se i rokovi pomijeraju i vi možete imati kandidate do izbora. Znači ko je završio proceduru ok, a ko nije kada se donese odluka o raspisivanju izbora u mjesnim zajednicama tada će se procedura kako odluka bude predviđala i provoditi.“

Omer Hadžić, sekretar Općine: „Pošto se prvi puta javljam sve vas pozdravljam i selamim. Ovo je Odluka o odgađanju izbora koji su bili planirani 14. maja i mi sada ne znamo rok. Bitan je datum i kada kažemo da će se održati npr. 15. jula to znači da u roku od 15 dana sve liste moraju biti dostavljene komisiji za provođenje izbora u mjesnoj zajednici i to je krajnji rok i sve procedure do tog roka koje slijede moraju se završiti. Ako je neko odredio rok on je završio, predao je prije vremena komisiji za provođenje izbora i on je odradio svoje. Ovi koji nisu započeli proceduru imaju priliku da krenu i da po svom statutu i propisima dovedu do kraja. Ovdje vidim da ima problema, jer pojedine mjesne zajednice ne funkcionišu. U tom slučaju po Statutu općine može se uvesti povjerenik koji će odraditi sve poslove koji savjet mjesne zajednice ima ako su narušeni odnosi, a to predlaže načelnik, a Vijeće donosi. Ja mislim da do toga neće doći, jer kada mi proglasimo dan izbora, ne znači da će u svim mjesnim zajednicama biti verifikovani izbori, jer može Vijeće predložiti da se ponište, odgode, imaju razne varijante koje se mogu desiti, a unaprijed govoriti šta će biti ja se u to ne bih upuštao.“

Emira Karić, predsjednica kluba vijećnika SDP: „Replika i sekretaru i zamjeniku predsjedavajućeg. Prije svega zamjeniče predsjedavajućeg, ja ne vidim po čemu vi vidite da sam ja nervozna, čak što više jako sam mirna. Zahvaljujem se sekretaru ovo je bio dobar odgovor kojeg ja prihvaćam ako je neko u proceduri neka završi proceduru, a ako nije procedura će se odrediti i dolazimo do dobrog odgovora i prihvatit ću ovo.“

Senada Džanić, predsjednica kluba vijećnika SBB – BPS – SBiH: „S obzirom da je sekretar rekao baš ono što sam govorila i isticala kada smo usvajali izvještaje mjesnih zajednica, trebalo se uvesti povjereništvo, a ne prihvatiti izvještaj mjesne zajednice gdje su vrata zaključana i gdje mjesecima nema nikoga.“

Kemal Bratić, općinski načelnik: „Pošto sam predlagač ove odluke smatrao sam da nije dobro i da ne bi bili u mogućnosti da provedemo izbore u ovakvoj situaciji i ograničenju. Znači mogli bi mi pokušati, ali kako bi to na kraju izašlo, ne znam. Prijedlog sam dao kada je bilo u posve velikoj uzlaznoj putanji broj zaraženih kako na području općine, tako na kantonu i cijeloj državi. Ne bih da govorim o savjetima ili rukovodiocima savjeta a ljudi nisu ovdje prisutni. Ja znam da jedna mjesna zajednica nije godinu i po dana sazvala savjet. Znam da ljudi ne dolaze, a znam da je izborna komisija imenovana i da je jedan čovjek imenovao, ali nemojte da pričamo o tim stvarima ovdje, jer otvorit ćemo. Možemo mi ovdje pričati o svemu, ali došli smo do toga da trebamo birati i hajmo izabrati bolje ako nam ovi nisu valjali. Znači korektno je da pričamo o nekome kada je tu prisutan, a ne da mu pričamo iza leđa. Mislim da je ovo dobra odluka i da ju trebamo svi podržati jednoglasno, jer ništa nam ne znači ako pomjerimo izbore u mjesnim zajednicama. Moja procjena ili nada da tako kažem je da će se ovo smiriti do kraja juna i onda ćemo na nekom od vijeća donijeti odluku da održimo te izbore i ako Bog da da izaberemo savjete koji će bolje raditi nego što su ovi radili. Ni jedna mjesna zajednica osim Klokočnice i Velike Brijesnice nemaju profesionalna lica zaposlena, moramo i to znati. Znači tamo vrata treba da budu otvorena stalno i da imamo pravo da podnesemo nekakvu pritužbu. Ove ostale nemaju. Zašto nemaju, hajmo se zapitati svi. Da li da donesemo nekakvu odluku kojom ćemo reći da su dužni bez obzira što su volonteri da budu dva dana po dva sata ili po sat upravo za ovo što je vijećnik Haris pričao da neko može da se obrati i da pita ili da podnese nekakvu inicijativu ili prijedlog. Tako da vas molim da završimo ovu odluku i bilo bi dobro da ona bude jednoglasna, jer nije politička odluka. Znači svi, jer vas je većina prisutnih bila u izolaciji i hvala Bogu svi smo prošli bez nekih većih posljedica tako da je jedini razlog zašto sam predložio je upravo ovaj covid 19.“

Haris Sinanović, vijećnik SDP: „ Samo da kažem da ne bi došlo da zabune pohvaljujem odluku što se tiče odluke i svi ćemo je podržati, ali obzirom na moja iskustva od ranije u izborima za savjet mjesne zajednice u Stanić Rijeci htio sam da napomenem da sam dolazio u situaciju i evo napomenut ću da sam 2016. godine dva dana prije isteka roka za predaju kandidatskih listi bio prinuđen da vučem za rukav i predsjednika izborne komisije u Stanić Rijeci i predsjednika Općinske izborne komisije i bio sam prinuđen da pošaljem poštom u zadnjem minutu. Znači radilo se sve da ne bi predali ove liste i iz tog razloga tražim pojašnjenja čitavo vrijeme. Ovdje piše da se odgađaju izbori i ovo što je pravnik rekao i da pojasnimo da se odgađaju izbori i procedure i da to usvojimo, ko nije završio naravno i da se onih 15 dana odnosi prije održavanja izbora i da imamo pravo predati liste. Kada se raspišu novi izbori ne znam 15. decembra da mi do 1. decembra možemo predati liste. Samo to ništa više.“

Senada Džanić, predsjednica kluba vijećnika SBB – BPS – SBiH: „ Ja se moram nadovezati na ovo što je načelnik govorio da ni sama ne volim pričati o osobi koja nije prisutna. Međutim dvije godine imamo situaciju da nemamo predstavnika savjeta mjesne zajednice kada se podnosi izvještaj, pa nemamo priliku da pričamo kada je tu. U Savjetu Mjesne zajednice Stanić Rijeka i ja ću izdvojiti, a da se ostali ne naljute, da ima Jakub Dedić koji jako savjesno i odgovorno radi svoj posao. Međutim nema priliku da radi, jer se sastanak ne saziva po pola godine i više. Ovo nije lično protiv bilo koga, ali svaku inicijativu koju ću ja podnijeti očigledno će biti odbijena i evo odbijena je od vijećnika iz Stanić Rijeke, a znate sa koliko problema se susreće Stanić Rijeka. Građani nemaju priliku kome da se obrate, jer ta vrata su zaključana, a ne uvodi se povjereništvo, nego hajde čekat ćemo još.“

Selmin Karić, predsjedavajući Općinskog vijeća: „ Nije predsjednik mjesne zajednice jedini koji može sazvati sjednicu savjeta mjesne zajednice i mislim da nije korektno na jednu osobu to sve prebacivati.“

Hasan Hasančević, predsjednik kluba vijećnika SDA: „Izgleda neki od nas ne čitaju statute mjesnih zajednica. Svaki član savjeta ima način kako da dođe do saziva savjeta mjesne zajednice bez predsjednika i bez sekretara ako ima problem i ako ima toliku želju. Stoji konstatacija da se u Stanić Rijeci održao mali broj sastanaka. Stoji to, ali ne stoji da ne može niko sazvati. Znači neće niko da se suprostavlja i treba Vijeće da odlučuje za njih tamo, da mi donosimo neke odluke i da im uvodimo povjereništvo. Ja nisam za to. Ako pola savjeta radi, a pola ne radi, znači ono pola savjeta se sazove i idemo dalje, jer ima poslovnik i zna se kako će se doći do toga. Ne treba da polemishemo, moramo pročitati, a ne nama ovdje vrijeme oduzimati bez veze.“

Emira Karić, predsjednica kluba vijećnika SDP: „ Ja ću se složiti sa načelnikom kada kaže da hajmo stati sa ovima ko je radio radio, a ko nije radio i ja se donekle slažem, jer idu ti izbori da biramo bolje. Imamo te izvještaje mjesnih zajednica i da se tu zaista povede računa u narednom periodu u ovom sazivu vijeća ko je i šta je radio i da ti izvještaji malo budu sadržajni. Isto tako mi se nalazimo u kapitalističkom društvu gdje sve treba biti adekvatno plaćeno od sekretara i predsjednika do članova i ja se za to u potpunosti zalažem. Jesam i za socijalno društvo, ali jesam i za društvo u kojem se neke stvari, osim ako ti sam ne odrediš da budeš volonter, itekako naplate shodno tim svojim aktivnostima da ne budemo ni precijenjeni i podcijenjeni, ali da se plati. Trenutno po meni osim profesionalnog u Klokotnici niko nije adekvatno plaćen, ni sekretari, volonteri ili predsjednik i to mora ići na neku veću sumu. Opet se vraćam na nas vijećnike, molim vas razmišljajte o tome da zajednički donesemo da idemo na volonterski, jer nam tih 200 i nešto KM ne znače baš puno.“

Zerina Subašić, predsjednica kluba vijećnika PDA i NL: „ Prvi puta da vas sve javno poselamim, načelnika, predsjedavajućeg, vijećnike i da odgovorim zašto neću podržati inicijativu. Prvo, trotoari imaju kod magistralnog puta i zašto nikada nisi slikala automobile parkirane kod restorana Putnik na trotoaru i prijavila. Drugo, LED rasvjeta je postavljena na više mjesta, ni to nisam podržala zato što se trenutno radi na tome. Za Haskić ću da razmotrim zašto nisam podržala.“

Senada Džanić, predsjednica kluba vijećnika SBB – BPS – SBiH: „ Zaboravili ste kolegice Zerina i pješački prelaz. Ja vas molim, ja nikada nisam dobacila sa mjesta na ovakav način. Govorimo o sigurnosti učenika i građana u Stanić Rijeci, govorimo o dijelu gdje nedostaju trotoari da su potrebni i govorimo o obilježavanju pješačkog prelaza i stavljanje znakova za smanjenje brzine. Ja ću morati napustiti sjednicu, jer se bojim biti gdje nema maski. Ugrožena sam, načelniče. Ako će neko u ovoj sali biti bez maske ja stvarno ne mogu prisustvovati sjednicama vijeća. Neka se izdvoji i neka sjedi pored prozora. Osam sati dnevno nosimo maske, bojimo se, jer znate šta nam se dešava.“

Selmin Karić, predsjedavajući Općinskog vijeća: „ Četiri metra ste od kolegice. Ima li još prijavljenih? Nema. Zaključujem tačku i koliko sam vidio otklonjene su nejasnoće. Znači oni savjeti mjesnih zajednica čije su procedure u toku, odnosno koji su završili procedure oni su ispoštovali ono što su trebali, a ostali moraju ispoštovati ono što treba 15 dana prije roka kada budu zakazani izbori.“

Emira Karić, predsjednica kluba vijećnika SDP: „ Predsjedavajući, ako kod ovih koji su završili bude određenih promjena i te promjene se mogu isto tako, jer izbori mogu biti za tri mjeseca i mi ne znamo gdje će ko biti.“

Kemal Bratić, općinski načelnik: „Razmišljao sam o tome kada ste diskutovali i može biti za tri do četiri mjeseca i neko će otići pa neće biti na listi ili će se predomisli. Ja predlažem da Vijeće uz usvajanje ove odluke stavi zaključak da se poništavaju sve procedure u svim mjesnim zajednicama koje su to uradile i to će olakšati, ako se slažete.“

Selmin Karić, predsjedavajući Općinskog vijeća: „Ja ne bih tako, načelniče. Oni koji su završili proceduru oni su svoj posao odradili i mislim da nema smisla da ponovo iste procedure provode. Znači ko je završio proceduru on je završio i to je završena stvar. Ko nije završio ima rokove koji će biti kada budu raspisani izbori. Vi ste donijeli odluke i vi ste sami sebi zadali rokove i završili ste to, a oni koji nisu imat će mogućnost kada budu raspisani izbori, jer nisu ni donosili nikakve akte, niti su išli u proceduru. Poslušat ćemo ono što je sekretar rekao, oni koji su završili procedure, oni su završili svoj posao, a oni koji nisu imaju mogućnost kada se raspišu izbori 15 dana prije održavanja izbora da završe tu proceduru.“

Emira Karić, predsjednica kluba vijećnika SDP: „Sekretaru ili načelniče, u biračkom odboru imam studente za koje znam sigurno da će ići u Njemačku. Znači naš birački odbor ne vrijedi, ako bi danas završili proceduru.“

Omer Hadžić, sekretar Općine: „Ne radi se o biračkom odboru nego o kandidatima koji se biraju.“

Selmin Karić, predsjedavajući Općinskog vijeća: „Znači jasno je sve. Ja sam zaključio tačku i dajem na izjašnjenje. Ko je za prijedlog Odluke o odgađanju izbora za organe mjesnih zajednica na području općine Doboj Istok?“

Glasanje: ZA – 17, PROTIV – 0, SUZDRŽANIH – 0.

Ad.3. Razmatranje i usvajanje prijedloga Odluke o razrješenju predsjednika i člana Općinske izborne komisije Doboj Istok,

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0.

Ad.4. Razmatranje i usvajanje prijedloga Odluke o imenovanju predsjednika i člana Općinske izborne komisije Doboj Istok.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Što se tiče ove tačke a i nekih drugih kao kod Centra za socijalni rad da kažem da će klub podržati, jer prije svega nije imao amandmane, a na kraju krajeva nije ni bilo određenih prijedloga, jer svi prijedlozi su usaglašeni sa brojem koji je i trebao biti u tim odborima. Da kažem imat ću neka pitanja vezana za Centar za socijalni rad i da vidite da su opozicionari fleksibilni i da želimo da što bolje rade ovi novi članovi, da ne griješe i da idu prema nekim perspektivnim stvarima.“

Mehmed Mehinović, vijećnik SBiH: „Naravno želim da poselamim i pozdravim sve prisutne, ide ovo u dobrom toku, nije problem. Gospodine predsjedavajući, dozvolit ćeš mi da samo jednu rečenicu kažem mimo dnevnog reda, a to je neko lično moje iskustvo. Prebolovao sam teški oblik covida i htio sam da prenesem na vas da se dobro čuvate, jer to nije ni malo bezazlena stvar. Kada čovjek dođe u poziciju da vidi da nije važno ni kakvu stručnu spremu ima, ni koliko ima para, ni kakvu imovinu ima, da se bori sa svojim zdravljem i najvrednije je koliko ima prijatelja. Ja želim da se zahvalim svima koji su se interesovali za moje zdravlje, čini mi se da sam uspio to pobijediti, ima još posljedica, ali poželio sam za ovu govornicu doći. Za ovu Odluku digao bih

obadvije ruke da mogu iz razloga što smo dobili u ovu komisiju dva mlada čovjeka i svi koji su učestvovali u tome i nagovorili ih da se jave hvala im lijepo na tome. Vrijeme je da se prebacuju na mlađe ljude ove funkcije, a mi stari možemo biti savjetodavne prirode i da ih malo usmjeravamo u tom dijelu. Stvarno nije zlonamjerno i nikada nisam ni bio zlonamjerman u svojim diskusijama, niti ću ikada biti. Opozicija radi svoj posao i neće biti zlonamjerna, bar ja neću biti i govorit ću ono što mislim kako bi trebalo biti, ali znamo kako politički život fersera u određenoj sredini. Svake četiri godine su izbori i Bože moj ko pobijedi neka pravi pravila igre, a ostali neka prate i neka idu na pripreme i nema tu ljutnje nikakve. Htio sam da kažem da je ovo posve važna komisija i neko može misliti da se samo pređe preko toga. Ona je važna, jer pravi ambijent otprilike, jer ako dobro ne radi može nam napraviti nereda, a ako dobro radi bit će nam svima dobro. Ja se iskreno nadam imajući u vidu ove ljude, ovog drugog predloženog člana Bećirović Samira lično znam i može neko reći da sam subjektivan, ali radi se o kvalitetnom čovjeku. Mrkanović Nermina nisam znao i raspitivao sam se kod 5 – 6 ljudi i svi su rekli pozitivno, da se radi o krasnom momku, a kada su rekli ko mu je babo nema fulanja nikakvog. Samo jedna moja digresija, ja znam da je to takva podjela, međutim do sada u praksi, obzirom da sam učesnik u stvaranju ovih općinskih izbornih komisija dugi niz godina od našeg pravnika notara Jusufa Hodžića, našeg sudije Ifete i Šemsudina Bećirovića koji su svi bili pravници. Sada pravimo otklon i dolazi čovjek koji nije pravnik. Nije problem da ja to podržim samo sam dužan da kažem da je ipak po meni predsjednik ove izborne komisije trebao biti pravnik bez obzira o kome se radi. Nije upitno, podržat ću sigurno, ali da se vodilo računa bila bi čista desetka.“

Kemal Bratić, općinski načelnik: „O predloženim kandidatima neću posebno diskutovati, ali osjećam potrebu, jer je moj prethodnik rekao da je izborna komisija tijelo koje je veoma značajno da li će u toku izbora biti onako kako treba ili će biti, kao što neko reče, i nereda. Želim javno da se zahvalim dosadašnjem predsjedniku Izborne komisije gospodinu Šemsudinu Bećiroviću, kao i Sofić Kemalu koji je bio član Izborne komisije u prethodnom mandatu i smatram da su dobro radili u pethodnom periodu, ali kao što neko reče vrijeme je da to preuzimaju mladi. Kako će oni da se snađu, ja vjerujem da će biti dobri. Trenutno stanje je, čini mi se da je Mrkanović ekonomista po struci, da imamo dva pravnika u izornoj komisiji i ne bi trebalo biti problema. Da li je bolje da bude pravnik možda jeste, ali kako ono kažu dva pravnika tri mišljenja, jer uvijek imamo drugačija i različita mišljenja. Iskreno se nadam da će danas za ova dva kandidata biti usvojeno i želim im uspješan rad i ako ništa da rade kao što je radio dosadašnji predsjednik i dosadašnji član Sofić.“

Hasan Hasančević, predsjednik kluba vijećnika SDA: „ Stav Komisije za dodjelu općinskih priznanja, izbor i imenovanja je identičan ovim stavovima i razmišljanjima vijećnika. Bolje bi bilo da je pravnik, ali sve procedure su ispoštovane i sve je kako treba. Kolege koje su predlagale dotičnu osobu smatraju da je osoba dobra, a što se procedura sve je ispoštovano i mi ćemo podržati ovaj prijedlog.“

Izet Hodžić, zamjenik predsjedavajućeg Općinskog vijeća: „Želim samo da apostrofiram i da naglasim kao član komisije koja je sudjelovala u proceduri da je sve rađeno u skladu sa zakonskim propisima koji su trenutno na snazi.“

Selmin Karić, predsjedavajući Općinskog vijeća: „ Ima li još prijavljenih? Nema. Zaključujem raspravu. Ko je za usvajanje Odluke o imenovanju predsjednika i člana Općinske izborne komisije Doboj Istok?“

Glasanje: ZA – 17, PROTIV – 0, SUZDRŽANIH – 0.

Ad.5. Razmatranje i usvajanje Izvještaja o izvršenju budžeta u općini Doboj Istok za 2020. godinu.

Selmin Karić, predsjedavajući Općinskog vijeća: „ Materijal ste dobili, tačku dajem na diskusiju. Komisija za budžet, finansije, privredu i dijasporu je juče trebala održati sastanak, međutim zbog nedostatka kvoruma sastanak nažalost nije održan. Ja se nadam da se to ubuduće neće dešavati. Ono što želim reći da iz ovog priloženog dokumenta može se reći da je ukupno izvršenje budžeta na prihodima 89,9%, odnosno 3.765.222 KM, a rashodi 91%, odnosno 3.823.887 KM sa nekom razlikom od 1,1%, iz čega se može zaključiti da su u izvršenju budžeta prihodi pratili rashode i da je budžet realno planiran. Manje izvršenje budžeta na prihodima 10,10, a na rashodima 9% je nastalo uglavnom zbog nerealizacije potpora sa viših nivoa vlasti. Ono što je vidljivo i što je bitno naglasiti su prihodi od direktnih poreza, odnosno poreza za dohodak fizičkih lica nesamostalnih djelatnosti imali izvršenje od 108,31 %, a od indirektnih poreza je 98,57 % što je izuzetno dobro obzirom da su ovi indirektni porezi osnova svih budžeta, pa i našeg općinskog. Kod rashoda je bitno da su izvršenja na platama pratila plan i da su 95% izvršenja i ostali rashodi su uglavnom u manjoj ili većoj mjeri pratili plan budžeta. Obzirom da znamo da je u prošloj godini ekonomija uzrokovana korona virusom bila poljuljana i ne samo naša nego kompletna svjetska ekonomija, pa je po mom mišljenju izvršenje budžeta izuzetno dobro bilo i smatram da bi ovaj dokument trebalo potvrditi.“

Mehmed Mehinović, vijećnik SBiH: „Nekada sam znao cifre napamet, a sada valja čitati i naočare staviti. Iako su me kod kuće moji koji se najviše brinu o meni zamolili da se ne javljam za riječ uopšte, međutim profesionalno kada su ovakve stvari u pitanju jednostavno ne mogu a da ne dam svoj doprinos da to bude još bolje, da se pohvali što valja i da se usmjere neke stvari u dobrom pravcu. Mislim da moje znanje u toj oblasti može na neki način i pomoći, a vjerujte ništa neće biti zlonamjerno. Prošle godine je harala pandemija i naravno da se osjetilo, međutim posmatrajući budžet općine Doboj Istok mora se priznati bilo je napora za ljude koji su radili na budžetu da je on ostvaren. Ja ovdje posmatram da je budžet ostvaren sa 2.576.000 i da je bilo potpore sa viših nivoa vlasti 1.189.000 i da to ukupno daje 3.765.000. Ako se posmatra općina Doboj Istok i budžet općine Doboj Istok od momenta kada je usvojen PDV 2007. godine otprilike on se i kreće od 2.200.000 – 2.400.000, međutim sada vidite to je 2.576.000 i tražio sam uzroke kako je došlo do povećanja, a predsjednik komisije je to malo objasnio. U strukturi budžeta kada se posmatra neto budžet bez primitaka imamo jednu trećinu i malo jače od jedne trećine da su direktni porezi sa 951.000 ili 37%, direktni porezi 985.000, skoro milion KM, 38%, takse i naknade i vlastiti prihodi općine oko 600.000 KM ili 25% što daje 60%. Naravno ako posmatrate bruto budžet, to je dobro. U finansijskoj praksi kada se ovako posmatra struktura budžeta dobro je da je jedna trećina ovog i jedna trećina onog i jedna trećina onog, jer daje sigurnost općini da općina može egzistirati, pogotovo ako imamo u vidu da imamo u zadnjih pet godina rast ovih direktnih poreza. Šta to znači? Kada se uđe dublje u analizu pad indirektnih poreza, jer imamo pad indirektnih poreza i ja očekujem da će ona čak padati iz razloga što će država vjerovatno svojom fiskalnom politikom više izdvajanja sebi ostavljati, a manje će padati na kanton i općine iz razloga što valja podmirivati vanjske dogovore. Možemo očekivati još veći pad indirektnih poreza i zato je dobro da su nam ovakvi direktni porezi i da se izvršna vlast, pa i mi ovdje kao vijećnici moramo posvetiti našim privrednicima još više. Ovdje pogotovo porez na dobit od pojedinačnih i fizičkih djelatnika i valja ljudima titrati i pričati fine priče i podvući organima uprave da budu efikasni prema privrednicima da bi zadržali ovakve prihode, pa ako Bog da, da i ih i povećamo. Poznavajući ovu situaciju i mikro ekonomiju ovo je stvarno fantastično što je urađeno i stalno raste, što je dobro. Ne znam da li će dalje ići, ali bih zamolio organe, pogotovo u katastru i privredi itd. da budu efikasni prema ovima i da izvršna vlast obrati pažnju na to u narednom periodu, jer ne možemo očekivati da će biti bolje, možemo samo očekivati da će biti gore neke stvari, pogotovo u ovoj godini. Daj Bože, jer svi ćemo dijeliti i volio bih da to bude dobro. Ove takse i naknade nemaju se gdje više povećavati, jer takve su kakve jesu. Neću pričati

o prihodima od igara na sreću, jer sam već dosadio, uvijek pričam o njima. Drago mi je što su prihodi toliki, međutim vjerujte uvijek me zabrinjava kada vidim koliki su prihodi od igara na sreću u ovako maloj općini, koliko u ovakvoj krizi naše omladine i naših ljudi uplaćuje tu sportsku prognozu, uplaćuje tu kladionicu, jer posjećeno je stalno, kada prođem vidim. Ponovo apelujem kod ovih jednokratnih pomoći i kod Centra za socijalni rad i kod jednokratnih pomoći boraca iz budžeta općine, tamo gdje ja živim i gledam znam da je nekoliko njih bilo u Centru za socijalni rad i da ode direktno u kladionicu. Vjerujete mi da sam vidio to svojim očima. I dok sam ja radio u Opštini tako su pričali i zato treba malo povesti proceduru da se vidi kome treba i ne treba dati pare, jer sada ima besplatan obrok i ako treba obrok, plati mu obrok, ako treba podmjera plati mu podmjeru da zadržimo ovo. Opšta slika prihoda u općini Doboj Istok ko god kaže drugačije da nije dobro, dobro je. Ovo je nečija zasluga, pogotovo 1.189.000 potpore. Ja znam koliko napora treba uložiti da dođe, jer samo ne dolazi, vara se ko to kaže. Mi političari kažemo po vertikali i ako je vetrikala dobra to je dobro, međutim oko 200.000 KM je došlo i to je dobro. Da ne bi samo sve hvalio, mi uvijek kritikujemo onu rashodovnu stranu. U suštini mene ne interesuje koliko je goriva, koliko je reprezentacije, telefonskih troškova i kancelarijskog materijala nego gledam strukturu troškova. Naime, konto 821111 do konta 821619 je otprilike potrošeno 1.399.906 KM i to hoće reći da je uloženo na općinu Doboj Istok oko 1.400.000 i čovjek kada pogleda cifru to je zaista dobro. Ovdje mi neko kaže vidiš ti. Tačno je vidim dvoranu u Maloj Brijesnici, tačno je vidim tribine u Brijesnici, tačno je vidim da je i asfaltirano, ali volio bih da nekada i ja bih podržao budžet obadvijema rukama, ali kada vidim da ne znam šta je urađeno za 1.400.000, a dosta je toga urađeno. Kada sam govorio o prihodima 189.000 i oko 200.000 je i vlastitih sredstava iz budžeta klasirano tu negdje, a imaju prihodi marka na marku 60.000 i to je dobra stvar. Ja ne mogu iz razloga što ne znam šta je to, jer ja bih se htio pohvaliti šta je to sve urađeno. To se taksativno nabroji i to je jedna stranica, ništa posebno nije, ali riješili bi sve dileme. Lično bi se borio i bio bih propagator i pričao ovo što sada pričam za govornicom gdje god hoćete i poziciji i opoziciji da je ovo kako jeste. Šta je u troškovima još bitno ja to uvijek govorim, a znam da neće doći do toga, jer načelnik je rekao vi donosite odluku o naknadama vijećničkim paušalima i bacio lopticu tamo. Dobro mi nećemo to i ja ću vjerovatno podnijeti zahtjev da to bude volonterski. U ovakvom budžetu 1,7 % Vijeće učestvuje, odnosno u ovom kolaču mi trošimo 1,7%. Ako je to realno, evo slažem se i ja da je realno i da nema nikako i da taj 1,7% usmjerimo na nešto drugo. Bruto plaće i naknade u ovim troškovima učestvuju 33 % ili 847.426 KM. Mislim da je dobro to 33%, jer je nekada to bilo i 50% otprilike kada je budžet bio 2 miliona. Broj radnika je spao, a koliko ja vidim kako sam ja vijećnik nije Bog zna ni povećanje plata bilo, a vjerovatno je došlo do smanjivanja broja uposlenih. Evo zadovoljavajući je procenat da 33% učestvuje se u budžetu za plaće i to uopšte nije cifra koja se ne može iznijeti pred međunarodne finansijske institucije i da kaže da je dobra struktura i da ne zahvata preko 50%, jer to je opasno. Izdaci za struju i kancelarijski materijal, ugovorne obaveze itd. konto 613673 je 26%. Dobro to su neki troškovi, a ima i struja koja se plaća, rasvjeta i ostali troškovi. Konto 614 učestvuje sa 795.000 ili 31% i to su transferi, grantovi preduzećima itd. Podsticaj u poljoprivredi je bio 128.000 i to je jako dobro, otprilike u ovih 795.000 što je jako dobro. Vjerujte mi da je situacija kada se tiče strukture budžeta jako dobra. Volio bih da znam šta je 1.400.000, šta je to općina Doboj Istok uradila. Ne sumnjam uopšte i nemam nikakve sumnje vjerujte mi, nego bih volio da znam šta je to 1.400.000 kao vijećnik i bio bi dobar propagator među građanima Doboj Istoka da kažem šta je to sve urađeno. Čestitam svima na ovakvom budžetu, mislio sam da ću drugačije diskutovati, međutim kada sam se dublje upustio u posmatranje budžeta zadnjih 10 – 14 godina ovo je dobar budžet, možda čak i naveći neto budžet sa vlastitim prihodima i redovnim primanjima i možda najbolji do sada. Bilo je i drugačijih i većih i manjih, naravno, ali isto tako bio je budžet općine Doboj Istok 1998. godine 320.000, ali evo došao je na 3.765.000 što ide dobrim trendom. Po meni treba malo biti transparentniji, jer sam gledao neke budžete i trebao je biti zbog nas vijećnika koji nismo zlonamjerni i koji hoćemo pohvaliti ono što je dobro. Žao mi je što nisam prisustvovao komisiji. Vidio sam da me je Behara zvala, bio sam kod doktora i zaboravio sam ju nazvati, jer bio sam slobodan juče i vjerovatno bih došao. Izvinjavam se

komisiji ako je to zbog mene bilo, ali nisam znao termin. Želim puno sreće onima koji rade na budžetu u narednoj godini. Nije dobro, možda ima nekih tu odstupanja, pogotovo gledao sam projektovanje i ako smo usvojili rebalans budžeta da je se desilo u decembru mjesecu, pa se desila razlika u odstupanju 70% itd. Pogotovo projektovanje ne treba gledati, ali u odnosu na ovu strukturu to ne predstavlja ništa i neću da pričam o tim sitnicama. Ja sam lično zadovoljan osim ove transparentnosti o kojoj sam pričao.“

Emira Karić, predsjednica kluba vijećnika SDP: „Samo ću se osvrnuti na prethodnu diskusiju kolege koji kaže ja ne sumnjam. Ja ću biti iskrena i reći ja sumnjam. Takođe sam sumnjala u jednu ustanovu gdje je prilikom promjene vlasti moja sumnja ne da se ostvarila, nego nisam bila ni blizu onoga što je menadžment uradio i kakve radnje koje su dosegnule, da kažem kriminal. Proces se vodi i o tom potom. Dakle sumnjam i uglavnom se moje sumnje ostvare, ali budem i iznenađena.“

Selmin Karić, predsjedavajući Općinskog vijeća: „Ima li još prijavljenih? Nema. Zaključujem tačku i dajem na izjašnjavanje. Ko je za usvajanje Izvještaja o izvršenju budžeta u općini Doboj Istok za 2020. godinu?

Glasanje: ZA – 11, PROTIV – 3, SUZDRŽANIH – 3.

Tačka je dobila potrebnu većinu.“

Ad.6. Razmatranje i usvajanje Izvještaja o utrošku sredstava budžetske rezerve za 2020. godinu.

Selmin Karić, predsjedavajući Općinskog vijeća: „Tačku dajem na diskusiju.“

Mehmed Mehinović, vijećnik SBiH: „Moje je mišljenje da o budžetskoj rezervi ne treba diskutovati pogotovo jer je to diskreciono pravo načelnika da podijeli kako on smatra da treba. Samo mi je nešto zapalo u oko pošto su pomoći ovakve onakve. Ja znam čut će se to odmah da sam ja diskutovao o tome, odmah će neko ekspresno da kaže. Protiv čovjeka ništa lično nemam, međutim zbog pandemije, razlog samo zbog koje je dodijeljena pomoć, a da je to zbog bolesti uopšte ne bi diskutovao i naravno ne treba to ni mijenjati. 1.500 KM zbog pandemije Caffe baru „Queen“. Mi imamo kafe barova koji su zaista bili u teškoj situaciji i ako on izdržava svoju porodicu i ovi svoju porodicu izdržavaju. Mislim ili je neki savjetnik ili je nepromišljeno ili ima nešto što ja ne znam samo mi je simptomatično, a naravno pravio sam i ja neke greške, nije to u pitanju. Inače budžetska rezerva nije potrošena i čim nije potrošena, nije ništa. Ne znam koji su motivi i koji razlozi. Nemamo mi puno ugostiteljskih objekata na Doboj Istoku i moglo se ako ništa još neko dodati, pa da ide svima po neka crkavica. Čini mi se da bi ovo mogao biti neki ko problem. Meni se lično čini da sada ne treba biti problem ko je donio takvu odluku, jer on ju je donio iz određenih razloga, vjerovatno. Glasat ću ja za ovu budžetsku rezervu, ona je takva i to je diskreciono pravo za troškove koji nisu predviđeni budžetom i daju se iz budžetske rezerve. Mi smo izglasali budžetsku rezervu i to je dobro, ali ne znam jer ima još privrednih subjekata tog tipa i te djelatnosti koji su u posve teškoj situaciji i znam da nisu imali od čega izdržavati porodicu, a nisu dobili takvu pomoć.“

Emira Karić, predsjednica kluba vijećnika SDP: „Ja ću se dotaknuti ovog dijela mada sam i planirala pitati upravo za diskusiju kolege Mehinovića. Meni je drago što postoji budžetska rezerva i što je načelnik usmjerio u ovom slučaju uglavnom u pomoći liječenja. Međutim po meni to je jedna druga stavka. Mi trebamo onda povećati stavku pomoć pojedincima i to komisijski rješavati itd. Ja se sjećam da sam za određene inicijative koje sam predlagala novac planirala iz budžetske rezerve i dobila sam odgovor da se to ne može iz budžetske rezerve, da se budžetska rezerva koristi za to i to. Pozdravljam i drago mi je što je na ovaj način potrošeno, ali smatram da

smo trebali u planu budžeta povećati pomoć pojedincima, jer pazite ovo je sve bilo prije izbora tako da po meni nije, degutantno.“

Kemal Bratić, općinski načelnik: „Ružno je da kažete degutantno, a većina je otišla na liječenje. Je li vas tako dijete prekida iz klupe kada predajete lekciju? Drago mi je što je uvaženi vijećnik Mehinović pitao ovo i vjerujte da sam se i ja dvoumio, a radi se o sljedećem: u toku pandemije je urađena preregistracija tog kafea „Queen“ sa oca na sina. Samim tim je onemogućeno da on aplicira ili da dostavi podatke za ona dva mjeseca dok nije radio. Znači specifičan slučaj vjerovatno na kantonu. Ja sam uputio zahtjev i obrazloženje, odnosno objašnjenje Poreskoj upravi, oni su nam dostavili određenu dokumentaciju i mi nismo dali njemu, mi smo za radnike dali ono što je ostalim kafićima i restoranima koji nisu radili dala kantonalna vlada, odnosno federalna vlada. To je jedini slučaj, specifičan na našoj općini, a nisam čuo da je bilo ni na kantonu. Njihova nesreća je bila da su oni tada to registrovali kada je proglašena pandemija i nisu mogli dostaviti podatke za ona dva mjeseca koja su trebali dostaviti svi privrednici koji su radili i da li im je pao promet i da li nisu radili. Nažalost mogao je to sekretar pojasniti ovdje u obrazloženju i vjerovatno ne bi ni bilo pitanja. Znači jedini slučaj na našoj općini je taj, a vjerujem i na kantonu. Kada se radi o budžetskoj rezervi to je moje diskreciono pravo. Znali smo potrošiti nekada 5 %, nekada 15 % a sada je nažalost bila potreba tolika i ne zbog izbora. Ja bih volio da smo budžetsku rezervu potrošili u kupovinu cvijeća, u kupovinu kolača ili nečega drugog, a ne za ove stvari. Međutim kada dođe roditelj, a većinom se tu radi o djeci, veoma je teško ne donijeti ovakvu odluku ovako kako sam ja donio. Da li je ona 100% opravdana, ja vjerujem da jeste, jer svi oni dostave i nalaze i uputnice i istoriju bolesti. Ni jedna odluka se ne donosi onako i nije to izvadi iz džepa i daj, nego postoje određene procedure koje mi moramo ispoštovati. Nadam se da ste zadovoljni odgovorom.“

Senada Džanić, predsjednica kluba vijećnika SBB – BPS – SBiH, je napustila sjednicu (opravdano).

Emira Karić, predsjednica kluba vijećnika SDP: „Nećete mi više stavljati u usta vaše nerazumijevanje moje diskusije. Smatram da bi pomoć pojedincima trebala biti stavka od 100.000 KM i da svi građani, da li djeca ili stariji ili žene ili muškarci imaju pravo aplicirati. Komisija je ta koja će u tom momentu odrediti šta je prioritet veći, manji, kome u ovom mjesecu, a kome u drugom itd. To smatram dobrim stvarima i to smatram realnim i transparentnim stvarima. Pozdravljam što se išlo preko budžetske rezerve, ali kažem u idućoj godini vjerovatno ćete ići preko pomoći pojedincima, jer bi to bilo tako realno.“

Kemal Bratić, općinski načelnik: „Vi imate pravo da smatrate tako, ja smatram ovako i bit će ovako, da budemo jasni. Druga je stvar pomoć pojedincima. Znači postoji pravilnik koji je Općinsko vijeće usvojilo kako se dodjeljuju jednokratne novčane pomoći pojedincima i koji je to maksimalni iznos, a to je čini mi se 300 KM za pojedince. To ne može ako ljudima treba 4 – 5.000 KM za liječenje i da im odobrimo 300 KM za to liječenje. Kažem ponovo volio bih da to trošimo u cvijeće, u ekskurzije ili ne znam šta nego ne daj Bože bolesti nikome. Ima tu svakakvih slučajeva tako da ne trebamo ulaziti u to. Opet ponavljam na kraju to što vi smatrate to je vaša stvar, ja smatram drugačije od vas i tako će biti.“

Emira Karić, predsjednica kluba vijećnika SDP: „Stavka pomoć pojedincima i pravilnici itekako se mogu mijenjati. Ovdje se radi da sam pozdravljala u mandatu načelnika Mehmeda Mehinovića da je to išlo komisijski. Smatram da pomoć pojedincima stavka treba biti veća, treba biti tačan i dobar pravilnik i da se ide raditi komisijski i to je moj stav, a vaš je stav to itd.“

Kemal Bratić, općinski načelnik: „ Neko je malo prije lijepo rekao stavka pomoć pojedincima, vjerujte da nekada nemamo ni dan i što ćemo komplikovati. To je vjerovatno jedan od razloga

zašto je Vijeće donijelo odluku da ovo pojednostavimo. Isto tako ima dosta neopravdanih i ja znam, kao što neko reče, da ga vidim u kladionici ili da radi nešto drugo što ne bi trebao raditi. Hajde stavite se u nečiju poziciju, ko to može izvagati i ne daj Bože da se o nekome ogriješi, da li je to tačno ili nije tačno. Što se tiče budžetske rezerve milion posto je ljudima dato kako treba i da smo Bogdom mogli dati još po četiri puta više od onoga što smo im dali. Druga je stavka pomoć pojedincima, a na što će načelnik potrošiti budžetsku rezervu, to je moja stvar. Mogu sada u ovoj godini da kažem potrošit ću budžetsku rezervu na cvijeće ili na izbore u mjesnim zajednicama ili za pomoć OŠ Mala Brijesnica za kupovinu namještaja ili nečeg drugog. To je moje diskreciono pravo i nemojte ulaziti u to.“

Mehmed Mehinović, vijećnik SBiH: „Gospodine predsjedavajući, da se obratim sekretaru da je samo pojasnio ovu odluku izbjegla bi se moja diskusija sigurno. Apsolutno je prihvatam i ja sam pretpostavio da imaju neke specifičnosti, jer bi bilo opasno prihvatiti na svoja leđa bez takvog opravdanja takvu odluku, jer bi izazvalo lavinu. Prema tome, samo da je u obrazloženju naveo to.“

Emira Karić, predsjednica kluba vijećnika SDP: „Naravno vi možete budžetsku rezervu ove godine potrošiti u vaccine na primjer. Pozdravljam, potrošite i ovu budžetsku rezervu 2021. u pomoći ovakvog tipa. Ja samo govorim o rješavanju dobrog sistemskog rješenja za pomoć pojedincima koji se mogu mijenjati, odnosno te stavke i odluke se mogu mijenjati 300 KM bolest ova, 1000 KM operacija i mi to sve možemo dovesti do takve transparentnosti i do takvog utančivanja i jasnoće. Govorim samo o tome, a idete uvijek u krivom smjeru. Pokušavam kao opozicionar pomoći i dovesti neke stvari do transparentnosti i jasnosti, a vi odete u krivom smjeru. Evo pozdravljam i dignut ću ruku bez obzira što mi nije jasno otkud „Queen“ što kaže kolega Mehinović, zašto nije neko drugi i po meni je trebalo ići isto tako jednoobrazno.“

Kemal Bratić, općinski načelnik: „Jesi li slušala šta sam ja govorio? Da je u toku pandemije preregistrovana radnja na tebe i to si vlasnik, a ne možeš aplicirati za ova sredstva.“

Emira Karić, predsjednica kluba vijećnika SDP: „Izvinjavam se nisam pratila. Pokušavamo se razumjeti ovdje. Govorim o pomoći pojedincima i da tu stavku dovedemo zaista do jasnoće. Jako je potrebna pomoć, a pomoć je potrebna sada i u covidu. Neko nije imao, kao što je bila inicijativa, vjerujte mi „gazde“ govore kako su potrošili po 2000 KM za liječenje. Ja kažem hajmo potrošiti tu budžetsku rezervu u liječenje kome je potrebno. Govorim vam o stavci pomoć pojedincima i stvarno je moramo dobro razraditi, jer dolaze možda i lošija vremena i smatram da bi to trebalo komisijski, vi ste u većini i vi napravite komisiju, ali je za mene realnije.“

Selmin Karić, predsjedavajući Općinskog vijeća: „Nema više prijavljenih i tačku dajem na glasanje. Ko je za usvajanje Izvještaja o utrošku sredstava budžetske rezerve za 2020. godinu?“

Glasanje: ZA – 16, PROTIV – 0, SUZDRŽANIH – 0.

Ad.7. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2020. godinu.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Moram pohvaliti ovaj puta menadžment i direktoricu za ovaj izvještaj, moram reći covid ili korona izvještaj, jasno, precizno i tačno. Drago mi je da su prevazišli sve probleme koje su imali i da to sada sve ide u dobrom smjeru. Takođe i djeca predškolskog uzrasta koja treba da krenu u prvi razred isto imaju mogućnost u toj ustanovi da se educiraju do polaska u prvi razred. Drago mi je da sada objekat liči estetski, naravno tu imamo i dio utopljanje i drago mi je da je bilo pomoći i od TK i od Općine i ja se

zahvaljujem donatorima. Vidim da će direktorica vjerovatno ostati nadalje. Po njoj bi se mogli ravnati i ostali koji pišu izvještaje ili informacije, bez obzira. Tako da želim da joj se prenese, još jedanput od mene sve pohvale.“

Hasan Hasančević, predsjednik kluba vijećnika SDA: „ Samo da dodam da je i rad Upravnog odbora na čelu sa predsjednikom podrška direktorici za apliciranje i na općinski i na kantonalni nivo.“

Selmin Karić, predsjedavajući Općinskog vijeća: „ Ima li još prijavljenih? Nema. Samo jednu rečenicu. Ustanovu koja na 200.000 prihoda ostvari pozitivan rezultat od 20.000 KM i još je javna ustanova, naravno da treba pohvaliti. Zaključujem tačku i dajem na glasanje. Ko je usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2020. godinu?“

Glasanje: ZA – 16, PROTIV – 0, SUZDRŽANIH – 0.

Ad.8. Razmatranje i usvajanje Izvještaja o radu JZU Dom zdravlja Doboj Istok za 2020. godinu.

Selmin Karić, predsjedavajući Općinskog vijeća: „ Tačku dajem na diskusiju.“

Kemal Skopljak, vijećnik BPS – Sefer Halilović: „ Izvještaj je odlično urađen, a urađen je odlično zato što se odlično radilo u Domu zdravlja u proteklom periodu. Kada pogledate vidite da se puno toga više uradilo nego u prethodnom periodu i prethodnih godina, više usluga i jednostavno više posla je bilo. Menadžment Doma zdravlja je odradio odličan posao vezano za covid i usluge koje su pružene i odradene u tom periodu i to se u svakom slučaju mora pohvaliti i istaknuti, jer su odradili odličan posao. Jedino, ja bih volio da je ovdje direktor Doma zdravlja, jer postavio bih jedno pitanje, a možda i vi ovdje znate. Nama gore ne trebaju nikakve finansijske potpore, ni nagrade u tom pogledu. Mi imamo svoju plaću i radimo za tu plaću, jer činjenica je, po meni, da smo dosta dobro plaćeni za onaj dio koji radimo. Kada se radi o nagradama koje su predložene gore, ne znam ispred koga, ali ta nagrada je negativno djelovala i utjecala na odnos između uposlenika. Ne može neko odrediti neke stvari, a nije u toku svega gore u Domu zdravlja. Nagrađeno je par ljudi koji vode određene službe RTG i HES po 300 KM i u to je stavljena kompletna Hitna služba sa 16 ljudi sa 300 KM. Odmah da kažem Hitna služba je ta sredstva preusmjerila na donaciju za nišane jednoj našoj pacijentici koja je preminula u međuvremenu. Nama ne treba to gore i ne treba neko da nas dijeli na takav način. Dovoljna je bila zahvalnica Domu zdravlja i službama. Kada se već išlo u tu varijantu onda je trebalo konsultovati ljude koji znaju to uraditi i podijeliti kako treba, jer izbačena je laboratorija, a ne znam zašto. I ovo kada rasporedite na 16 ljudi u Hitnoj službi po 18 KM i nešto, a to je za nas bilo ponižavajuće i negativno je djelovalo na međuljudske odnose. Znači dovoljno je bilo zahvalnicu napisati hvala vam za doprinos u liječenju i ništa više ili da se rasporedilo kako treba. Žao mi je što nema direktora da mu postavim to pitanje, a ono ostalo je sve u redu i za svaku pohvalu je ovaj izvještaj.“

Mehmed Mehinović, vijećnik SBiH: „ Drago mi je kada sam čuo Kemala uposlenika Doma zdravlja govor i mogao sam se i prvi slobodno javiti. Ja sam pročitao misiju i viziju Doma zdravlja, to je meni važno i kao što sam vidio misija je ispunjena, a da nije ispunjena ja bih imao niz primjedbi. Međutim osnovni zadaci koji jesu su ispunjeni i iz tih razloga želim sa ovog mjesta da se sjetim ljudi i politika koje su bile u to vrijeme i koje su učinile dosta napora, da ne spominjem imena od Refika, Hasiba rahmetli i članova upravnog odbora i još ljudi koji su bili oko politike, kakvu smo borbu mi vodili za ostanak ovakvog Doma zdravlja. Što se mene tiče, a vjerovatno i ovih ljudi, halal bio svaki korak i svaka riječ i svađa, jer smo se svađali. Da znate kako je to 2002. i 2004. godine bilo sa 87 uposlenih u Domu zdravlja u Doboj Istoku. Pokazalo se kroz ovu pandemiju da je naša borba bila opravdana i ja lično u svoje ime i u ime tih ljudi koji su

se borili želim da se zahvalim menadžmentu i svim uposlenim u Domu zdravlja, jer održali se lekciju kako se dobro organizuje u datom trenutku i u teškim trenucima kako se organizuje i nemam baš nikakvih primjedbi. Ja sam i prošli puta diskutovao, obzirom da sam hronični bolesnik, pa konzumiram često te usluge Doma zdravlja, ovo je bilo još više od toga što redovno konzumiram ovdje kako je covid tim bio organizovan i kako je Hitna pomoć bila organizovana i tim ljudima treba skinuti kapu. Zaista treba pokušati da u ime Vijeća pokrenemo neku, mislio sam kao inicijativu, da makar uputimo jednu zahvalnicu za dobro odrađen posao u proteklom periodu i da im damo punu podršku da budu još bolji u narednom periodu. Ako ništa da im predsjedavajući u ime svih nas pošalje tako jedno pismo, pa nekome će biti drago. Kažem nije uvijek ovako bilo, bilo je tu borbe, počev od starih direktora Doma zdravlja, da bi došli do ovoga i sada je odnos medicinskog i nemedicinskog osoblja jako dobar iako se pokazalo da je i nemedicinsko osoblje dobro u ovoj situaciji. Mislim da nemam određene kritike, ali bio sam se zatekao u jednom trenutku i na mene je jedna čistačica zagalamila. Hoću da kažem da se ponašaju prema svakom pacijentu kako se ponašaju ko ti je rekao, bježi ovamo, a drugi izlaze iz druge kancelarije i njih propušta pored sebe. Nije sporno, ja sam upoznao sa tim glavnog tehničara, jer nije njeno, da je to doktor bio, pa hajde, nego je ona sebi uzela za pravo da bude glavna. To ne umanjuje sliku ovoga o čemu pričam da je naš Dom zdravlja jako dobar. Htio sam jednostavno da se sjetim tih vremena sa bivšom direktoricom i njenom pravnicom teški su bili razgovori, posve teški da nam Dom zdravlja ostane u ovakvom obliku. Svi su dali doprinos i članovi upravnog odbora i direktor i politike i ljudi koji su bili tu i evo pokazalo se da treba ulagati i treba se boriti za nešto, jer nikada ne znaš kada će ti zatrebati u datom trenutku. Ne znam druge kakvi su, ali naši su za peticu organizovani. Međutim ponovo moram reći, možda to i zaslužuje, naš Dom zdravlja ima budžet 2 miliona sigurnih prihoda koje im ne daju za pravo da se imalo opuštaju, jer to su prihodi općine, a općina mora sada smo govorili i ovo i ono, mora sve, a tamo 90% budžeta ide za plate otprilike i nemaju prostora za opuštanje. Želim da budu ovakvi, ako ne može biti bolje, a činjenica je da je ovo posve dobro. Ja im u svoje ime svima od prvog do zadnjeg, pa i do one čistačice koja je zagalamila na mene, želim svako dobro i puno sreće i da budu još bolji.“

Hasan Hasančević, predsjednik kluba vijećnika SDA: „Kada je tačka dnevnog reda Dom zdravlja Doboj Istok nemoguće je ostati ravnodušan, pogotovo u periodu pandemije, ali i prije toga je Dom zdravlja radio kako treba. Jednu stvar treba naglasiti, jedan od rijetkih domova zdravlja u Federaciji Bosne i Hercegovine koji vrši liječenje covid pacijenata. Možda nismo znali neki podatak, ali sam dužan da iznesem da Dom zdravlja direktno vrši liječenje covid pacijenata koji ne trebaju za Tuzlu, odnosno kojim se terapija može davati u Domu zdravlja, a ide se i kući. Ja sam se informisao, jer imao sam situaciju da sam sebi morao naručivati lijekove iz Bosanske Gradiške, da gradovi koji imaju domove zdravlja 100 godina nisu organizovani što se tiče covid bolesti na ovaj način na koji je organizovan Dom zdravlja Doboj Istok. Da ne bi prehvalili, kao što Meho reče, ima tu nekih stvari od porodične medicine gdje se mogu vršiti dorade, kao i svi mi u svojim poslovima možemo bolje i kao što naš načelnik kaže uvijek može bolje, jer i kada je dobro i odlično uvijek može bolje. Tačno je da može uvijek bolje, ali kada prođe covid i ove stvari kada se riješimo, onda možemo pričati i o tim stvarima, o popravkama, jer u porodičnoj medicini ima dosta stvari koje bi trebalo oduzeti. Evo pričamo i o ponašanju osoblja, mada je to nekada individualno i kućni odgoj, međutim treba neko iz menadžmenta da im kaže, a mislim da im i govori, o takvoj vrsti odnosa prema pacijentima. Neću reći je li to loše ili dobro, jer možda i mi kao pacijenti nekada nešto proizvedemo. I ja sam imao situaciju da zagalamim u tom smislu, ali nije to ništa strašno, sve su to normalne pojave, a vjerovatno i ova korona psihički djeluje na nas sve, pa smo nekada malo nervozniji nego što treba. Čestitam na dosadašnjem urađenom poslu i evo uradili su vakcina mada naši mediji to nisu propratili. Znači naši stariji pacijenti koji su konzumenti Doma zdravlja preko 70 i 80 godina su riješeni i riješeni su svi zdravstveni radnici, naravno koji su htjeli, a riješen je i prihvatni centar Duja. Tako da u tom pogledu mi njima

trebamo čestitati u najmanju ruku za to. Ovo što Kemal priča o ličnim dohotcima svako voli da mu je bolji lični dohodak za odrađen posao.“

Emira Karić, predsjednica kluba vijećnika SDP: „Imam potrebu da se od srca zahvalim svim medicinskim radnicima ovog svijeta i naše države Bosne i Hercegovine i u ovom slučaju naših medicinskih radnika, odnosno medicinskog osoblja na području općine Doboj Istok. To je prvi bedem, prva barijera kroz koju prolazi oboljeli ili sumnjom oboljeli pacijent. Do sada niko nije izricao nikakve neugodnosti. Naši pacijenti bili su zadovoljni i zato ja pohvaljujem ovaj izvještaj ili corona izvještaj, covid izvještaj, kako bih ga ja nazvala. Šta će biti dalje u nekim drugim godinama vidjet ćemo da li će se stvari vratiti u boljem, u lošijem, o tom potom. Ja iskreno smatram da se ovdje šta treba pohvaliti da se pohvali, a što ne da se pokuša ispraviti. Ja bih se osvrnula, nisam htjela kod usvajanja zapisnika i moram reći da je na sramotu svima onima koji su bacili spin o mom prozivanju određenih doktora i medicinaru glede moje inicijative o osnivanju patronažnog covid tima i na taj način mene doveli u neugodnu situaciju sa određenim doktorima i određenim medicinarima. To mi je bilo nejasno obzirom da zapisnik izlazi nakon mjesec dana. Nakon ovog usvajanja zapisnika ja ću se itekako potruditi da saznam ko je mene doveo u takvu situaciju da sam prozivala doktore. Oni bacili po Doboj Istoku neke neistine o meni, odnosno mojim izlaganjima i evo došao je zapisnik i sve se vidi crno na bijelo. Saznat ću i tražit ću javno izvinjenje.“

Kemal Bratić, općinski načelnik: „Osjećam potrebu pošto je ovo jedna od najbitnijih ustanova na području naše općine da iskažem svoje zadovoljstvo. Drago mi je što čujem pozitivne diskusije kako pozicije, tako i opozicije i to je rijetka stvar oko koje se slažemo. Međutim mukotrpan je to rad i mi svakodnevno sjedimo sa direktorom i sa ekipom covid tima i pokušavamo da unaprijedimo ili da još bolje poboljšamo stanje. Neki dan smo dogovarali tehnologiju masovnog cijepljenja. Ja imam svoje mišljenje o Domu zdravlja, a imam mišljenje i o uposlenicima. Na svu sreću znamo se svi, mala smo sredina i kao što uvaženi vijećnik Mehinović kaže neko je zagalamio na njega. To je ono što je taj neko ponio od kuće i ja stalno direktoru to govorim, jer niko ne dolazi u Dom zdravlja da bi nekoga vidio ili da bi pio kafu i ne daj Bože nikome da dolazi u taj Dom zdravlja. Ja nisam bio zadnjih 7 – 8 godina, pa sam, zadnjih mjesec dana bio 4 – 5 puta. Imamo mi to svugdje, nadam se da se Adis neće naljuti imamo i u Elektrodistribuciji, jer su drugačiji ljudi, drugačiji karakter i drugačiji mentalitet, a imamo toga i ovdje. Ono što uvijek govorim i direktoru i glavnom tehničaru i prijateljima sa kojim saradujem da nije teško pozdraviti, dobar dan, selam, šta ste trebali, pa ako ne možemo pomoći, uputiti čovjeka tamo. Ja sam dobio informaciju da neki čak i na ove starije kategorije, čovjek ima 80 godina i došao kod ljekara i sada mu neki tehničar ili tehničarka popuje šta treba ili šta ne treba, a ne zna ni ona šta treba ili šta ne treba. To je problem kod nas generalno u društvu i mi to moramo mijenjati. Ja pokušavam da promijenim i u Domu zdravlja i u komunalnom itd. Moram istaći neka se ljuti ko hoće glavi teret ove pandemije nose covid timovi i služba Hitne pomoći. Ne bih stavljao na vagu ko je više od njih, ali znam iz prve ruke kako se radi i šta se radi. Neko je prije mene rekao, treba uputiti neku zahvalu i ja sam čak razmišljao da možda kada se malo situacija smiri možda i neku novčanu nagradu, ali kako izabrati, jer znamo da ne rade svi isto, pa će to izazvati revolt onaj radio, a onaj nije radio itd. Bila bi dobra možda jedna zahvala ispred Vijeća, ali ne sada, jer čim počnemo hvaliti počet će popuštati, to je moje mišljenje. Mislim da trenutni direktor dobro vodi ustanovu i sve je do prvog kako u kući tako i u svakoj ustanovi, ako je dobro on je zaslužan, ako nije on je kriv. Mislim da je dobro, da su poredali prioritete i da to ide u boljem pravcu i ovaj odnos prema pacijentima. Kada me je pitao načelnice šta očekuješ od mene, očekujem da budu pacijenti zadovoljni, ništa drugo, ništa me drugo ne interesuje. Mislim da svakog od ovih koji izazivaju neke probleme sa našim pacijentima pošaljemo u Hitnu na mjesec dva dana da vide kako se tamo radi ili da ih pošaljmo na Duja na mjesec dva dana da vide kako se gore radi. Mislim da bi onda ti ljudi koji prave te probleme, a nema njih puno i otprilike su, kada sa građanima razgovaram nema primjedbi na ljekare, nego samo na neke koji ne ostave

svoje probleme kod kuće, nego ih donesu na posao, pa napadaju i galame. Ko si ti da galamiš na bilo koga i zna se šta je tvoj posao tu bez obzira šta si i ko si. Izašao sam prvenstveno, jer se radi o najbitnijoj ustanovi na području naše općine i drago mi je da je i opozicija u vrijeme ove pandemije, jer smo na neki način pogodili sa imenovanjem ovog menadžmenta. Ja se iskreno nadam da će to ići u sve boljem i boljem pravcu.“

Selmin Karić, predsjedavajući Općinskog vijeća: „ Nema više prijavljenih. Mi smo u prethodnom periodu imali covid informaciju za ovaj period koj je naznačen u ovom izvještaju i tada smo pohvalili rad kompletnog Doma zdravlja, svih radnika, a naročito službe Hitne medicinske pomoći i covid timova, ali i svih ostalih radnika. Ja im se ovom prilikom zahvaljujem i želim im još više uspjeha u daljem radu. Zaključujem tačku i dajem na izjašnjenje. Ko je za usvajanje Izvještaja o radu JZU Dom zdravlja Doboj Istok za 2020. godinu?“

Glasanje: ZA – 16, PROTIV – 0, SUZDRŽANIH – 0.

Ad.9. Razmatranje i usvajanje Izvještaja o radu JU Centar za socijalni rad Doboj Istok za 2020. godinu.

Selmin Karić, predsjedavajući Općinskog vijeća: „Tačku dajem na diskusiju.“

Mehmed Mehinović, vijećnik SBiH: „Poslije ove diskusije možda ću biti ljut sam na sebe, ali hoću da kažem ono što mislim, ništa nije zlonamjerno, sve je istinito. I ovo je jedna od institucija čije sam izvještaje znao pohvaliti i kvantitet i kvalitet, sve je prisutno, nemam govora. Kada posmatram Centar za socijalni rad gledam 7 uposlenih, lijepi, mladi, školovani i kadrovski popunjeni, sa dva diplomirana pravnika, pa mislim da mogu odgovoriti svakom zadatku. Posmatram za neki period kada je bilo 3 pa 4 uposlena koji su odrađivali ove iste redovne poslove, ali je sada puno više ovih vanrednih poslova na koje ja i želim da se fokusiram. Dobro je osnivač do sada uradio za Centar za socijalni rad, jer mislim da rijetko ko ima ovako riješen prostor sa 150 kvadrata za 7 radnika, a to je 20 kvadrata po radniku i to je zaista komfor. Imaju to, kadrovski riješeni, visoke stručne spreme, pravnika imaju i nema razloga da ne bude ovako kako jeste. Tačno je da je odrađeno dosta posla i da je dosta para došlo na općinu Doboj Istok koje su proslijeđene po pravima, ostvarenim pravima i uopšte ne sporim da nije bilo posla i da se ne radi. Međutim osvarnut ću se na 3 i 4. stranicu, a ne bih ni to puno analizirao da budem iskren da mi se nešto nije desilo na dan kada su bili izbori. Ja sam to bio zaboravio, pa čitajući ovo sjetio sam se da negdje poslije glasanja, a bilo nas je troje četvoro, jedna žena nešto govorila što me asociralo na ovo. Hoću da kažem da su zaista ovi u Centru za socijalni rad zaslužili da su odradili dobar posao glede izbora u općini Doboj Istok. Svaka im čast, a naravno da su radili za mene, zahvalio bih im se i ja, ali su odradili dosta kvalitetan posao. Naime, ta žena je rekla ja znam za koga ću glasati, jer dobila sam dva metra drva, dobila sam peć itd. Gledam ja koliko je ovih vanrednih sredstava došlo i podijeljeno i meni je drago što je to došlo našim građanima koji se osjećaju ugroženim. Međutim razmišljao sam da postavim pitanje da direktor dostavi tabelu ko je sve dobio ove pomoći peći, drva itd. Vjerovatno, što je i opravdano, to bila neka profesionalna tajna da se ne govori i ja to prihvatom. Međutim kada uđeš u tu analizu pa 190 paketa, pa po 100 KM itd. možete svi to pogledati, u to dijelu moram sa rezervom prihvatiti ovaj izvještaj. Ovo što govorim, govorim tačno, znači niko mi nije prenio, ja sam bio prisutan tu. Dobar su posao odradili i ovaj redovni posao, ali isto tako čestitam im da su dali dobar doprinos rezultatu. Ja ne kažem da je to loše, ali drugačije je kada se harče svoje pare, a drugačije je kada se harče ovako ove. Mislim da ovo zabrinjava i uzmite i pročitajte svi stranu 3 i 4. i da ćete dijeliti moje mišljenje da je to tako. Ako hoćete da kažem ime i prezime žene koja je sjedila preko puta mene, nikakav nije problem kazat ću, ali da ne otvaramo temu, bolje je.“

Hasan Hasančević, predsjednik kluba vijećnika SDA: „ Ja se ne bih baš složio sa kolegom Mehom, da je harčenje para, ali evo o tom potom. Kada se donesu projekti sa viših nivoa isto tako

je problem gdje ih ugraditi i onda kažu da je načelnik na osnovu projekta tog i tog dobio glasove na tom i tom mjestu. Sastavni dio Centra za socijalni rad je ovo što je napisano na 3 i 4. strani. Tačno ili netačno sastavni dio je da dijele humanitarnu pomoć, da traže i da stabilizuju situaciju, ali o tom potom. Navest ću još jedan primjer. Ja sam dovezao svoju biku rahmetli, u stvari dovezao je drugi, a ja je uveo na glasanje da bi jedan od prisutnih kazao zašto je Hasko uvodi? Zato što je moja bika, da je ne bi ti uvodio, jer ja joj unesem i drva, donesem joj penziju i odvedem je doktoru itd. Ovaj izvještaj je fantastičan i zahvaljujem se i kao što sam rekao i za Dom zdravlja, tako i za Centar za socijalni rad i Obdanište sam hvalio godinama, ali ovaj put nisam izlazio, a evo kolegica Emira je to sve potvrdila, mada nekada su znali raditi i drugačije po pitanju obdaništa, kao što reče Meho ne bih da otvaramo i ne ulazimo u neke dublje analize. Ako budemo ulazili u neke dublje analize znamo ko je htio gasiti, paliti itd.“

Omer Konjić, vijećnik SDA: „Selamim i pozdravljam sve prisutne. Mislim da su na Centru za socijalni rad mnogi radili izbornu kampanju i da malo popuste Centru. Centar za socijalni rad od 2013. godine dijeli ta drva, isto dijeli te pakete i to možete vidjeti u izvještajima od ranije, pa ćete vidjeti da se drva dijele svake godine. Svake godine se broj tih porodica povećava i u narednom periodu ću se potruditi, ako budem tu, da ću povećavati svake godine, jer draže mi je kada dođe marka na općinu Doboju Istok nego da ide na neku drugu općinu. Što su ove godine bili izbori i što je to nekome zasmetalo uzmete samo izvještaje od ranije i pogledajte je li isto bilo i 2014 i 15 i 16. pa sada i u ovom izvještaju.“

Kemal Bratić, općinski načelnik: „Veći dio diskusije mi je uzeo direktor. Ono što ja znam, a imam solidnu memoriju je da su otprilike svi izvještaji Centra za socijalni rad koji su se do sada usvajali slični ili ovakvi u pet deka, što znači da su radili to što rade. Na svu sreću da je ekipa u Centru za socijalni rad podmlađena i da donose sredstva, a odakle ih donose evo i ne interesuje me. Znam da su povezani sa nekoliko tih organizacija i ja znam nekada zamoliti direktora da proturi neku porodicu koja je u nekakvoj potrebi da li drva, da li paket i baš smo neki dan intervenisali u Mjesnoj zajednici Brijesnica Velika. Da li je neko to koristio za izbore, ja ne znam, ali ako jeste, nije trebao to koristiti i zloupotrebljavati. Pretpostavljam da su to otprilike isti korisnici koji su bili i nekada prije. Po onim informacijama koje ja imam i spiskovima koje ja imam, da li su svi opravdano, da budem iskren ne znam, da li su mogli kupiti drva, ne znam ni to. Dobro je da je ekipa mlada i da ekipa zabacuje na više strana i onda kada to dođe naravno da treba podijeliti. Ko će odlučiti? Pa vjerovatno odlučit će oni. Naš cilj je bio da popravimo uslove Centra za socijalni rad i još po sistematizaciji trebali bi socijalnog radnika da bi zadovoljili po broju korisnika koje ima općina Doboju Istok. Znači ako je direktor ili bilo koji uposlenik to zloupotrijebio ja to ne podržavam i nije dobro. Kampanja je bila i kao što neko reče u kampanji je sve dozvoljeno i svi znamo ko je šta radio i trebamo jedni drugima halaliti. Smatram da naš Centar za socijalni rad dobro radi, da je razdrman, da je podmlađen, da je jedno vrijeme bio uspavan, znam ja bio sam živ u tom vaktu i znam kako se radilo i po meni sada je on dobar. Treba ga još pojačati, a bit će tu još kadrovnskih promjena tako da nastavimo sa radom.“

Mehmed Mehinović, vijećnik SBiH: „Znao sam ja da ću izazvati lavinu diskusija, a gospodinu direktoru poručujem nikakav nije problem, ja nisam ni malo naivan. Ja sam uzeo i prošle izvještaje Centra za socijalni rad i pretprošle izvještaje Centra za socijalni rad, pa sam ih uporedio i govorim argumentovano. Hasane, možeš na prvoj strani vidjeti šta je zadatak Centra za socijalni rad, a zadatak je i ovo što rade i nikakav nije problem. Da li je slučajno ili ne ekspanzija bila u prošloj godini toga što jest, ali direktore da ne otvaram stojim ti na raspolaganju da sjednemo da se suočimo i da ti kažem šta je bilo, nikakav nije problem i mislim da bi to bilo bolje.“

Emira Karić, predsjednica kluba vijećnika SDP: „Direktore, načelniče, nisam se stvarno mislila javiti pod ovom tačkom, ali kada se već baca prašina u oči ja ću iznijeti ono što ja znam kada je u

pitanju ova diskusija. To da je u kampanji sve dozvoljeno, ja se načelnice nikako ne slažem. Da li ću ja koga počastiti ručkom ili kupiti mu cvijeće to je moj izbor, ali kada je u pitanju budžetski novac i trošenje tog novca u ime kampanje, to itekako nije dozvoljeno i ja smatram da je zakonom zabranjeno. Ja ću iznijeti svoje viđenje budući da sam zaista sudjelovala u kampanji na taj način da sam išla od vrata do vrata, jer nisam imala drugih mogućnosti. Mene slobodno po ovome možete na detektor laži priključiti da u kuće u koje sam ulazila spominjalo se direktore vaše ime u kontekstu izbora. Neka se završi na ovome. Ono što mi je smiješno da ljudi nisu razlikovali iako sam bila odjevena u tu neku odoru koja pripada mojoj stranci, nisu razlikovali ni to nego su mi rekli sve je u redu i bit će to u redu itd.“

Hasan Hasančević, predsjednik kluba vijećnika SDA: „Također, kolegice gdje sam ja ulazio u kuću spominjalo se vaše ime da ste dolazili i nije bitan budžetski novac, da su plaćani glasovi. Uvažena kolegice, ja imam video snimke za određene stvari koje su rađene u Klokotnici i koje sam ja prekinuo za vrijeme izbora. Ima zapisnik u policiji koji nije pokrenut, tako da nemojte da pričamo o nekim stvarima. Meho je dobro rekao na početku ako otvaramo onda ćemo otvarati nije sporno ništa. Niko nije melek, niko ovdje od prisutnih nije melek. Svi mi imamo mahana raznih vrsta, ali eto ja bih ko mogao imati a neko drugi ne bi mogao imati za isti posao. Za istu smo se mi funkciju borili za vijećnika Općinskog vijeća Doboj Istok, samo jedan na jedan drugi način, jedan na treći, a jedan na četvrti. Ista su se imena spominjala svagdje i u Habibovićima i u Polju i u Ahimbašićima, sve se zna. U ovom slučaju vi ste zakasnili oni su došli prije i tako sam na određenom mjestu ja zakasnio, ti završila i tako je to bilo. Tako da znate da svi imamo aferima.“

Omer Konjić, vijećnik SDA: „Ako je kod brkanja, vi uporno brkate. Ne znam kakav sam to budžetski novac ja trošio na izbore. Evo dođite do mene i vi gospodine Mehinović i vi Emira i ja ću vam sve spiskove iznijeti i predočit ću vam sve kome se šta dalo. Budžetski novac, marka nikome nije data za izbore kao što su neki gradili kampanju na Centru za socijalni rad i na budžetskom novcu. Ja sam isto tako čuo priče da sam od Kantona dobio 70.000 za izbore. Smiješne su vam te priče, ali evo dođite u Centar i dobro ste došli svi i sve ću vam predočiti. Drva idu svake godine i ja ne znam šta je sada sporno, valjda što su izbori bili, pa je to sporno. Da sam ja nekome išao, kao što ste vi išli od kuće do kuće i da sam tražio glasove, to je izvinite dezinfomisanje.“

Kemal Bratić, općinski načelnik: „Nije replika, želim samo da kažem da nisam izazvan ničijom diskusijom da bih ja diskutovao, ja sam i imao namjeru da diskutujem, jer smatram da Centar za socijalni rad radi dobro. Isto kao što radi Dom zdravlja dobro i oni rade dobro, rade svoj posao. Na početku svoje prethodne diskusije sam rekao da ako je rađeno nešto što nije trebalo, ja to ne podržavam. Ja znam da nije rađeno. To ako je nekome zasmetao kao protukandidat i zato sam rekao da je na izborima sve dozvoljeno. Nisam rekao da je dozvoljeno da se radi nešto nezakonito. Ja vrlo dobro znam da svi ovi vidovi pomoći dolaze i evo dijelit će se i ove godine i već se ova 3 – 4 mjeseca podijelilo silu toga. Nesretna okolnost je bila da su bili prošle godine izbori, pa smo bili malo nervozni, bili smo i umorni itd. Nije ova diskusija loša, po meni ona nije zlonamjerna i vjerovatno je Mehinovića izazvala neka gospođa koja je to uradila, ali evo i to se može razjasniti i da se vidi u čemu je problem. Ogovorno tvrdim da je trenutni direktor Centra za socijalni rad jedan od najboljih direktora od kako sam ja općinski načelnik. Znači čovjek koji je prvenstveno tu da radi onaj posao za koji je plaćen, čovjek koji tjera svoje radnike da rade posao koji treba da rade i čovjek koji aplicira na raznorazne strane. Nije on kupio drva, nije ni općina, on je to našao i pakete itd. To je dobra stvar i za svaku pohvalu i ja ti direktore čestitam na dosadašnjem vođenju ustanove i nadam se da će i ova godina biti kao i prethodna.“

Mehmed Mehinović, vijećnik SBiH: „Ni ja neću više diskutovati, neka mi opsuje ko god šta hoće, ali da kažem Omere Konjiću, mogu ti biti babo ti to znaš dobro i nisi svjestan šta si rekao. Načelnik nađe 1.300.000 i nema on pravo potrošiti gdje hoće tih 1.300.000. Isto i ti nemaš pravo

potrošiti gdje hoćeš kada dođe pomoć. Nemaš pravo. Za šta su namijenjene trošiš te pare. Ti si rekao nađite vi, pa potrošite. Neću ja tražiti, ti si direktor Centra. Ne znaš šta pričaš. Druga stvar evo dobro je to definisano i ja sam to zaboravio, ali sam se sjetio, a imam i svjedoke. Čovjek je došao i kaže direktor je došao i ja znam za koga ću glasati, jer mi je rekao da glasam tako. Ja sam upoređujem i vidim koliko je toga bilo puno više nego 2019 i 2018. godine, puno više. Ja sam rekao vi ste mladi, lijepi, školovani, to zaboravljate, ima kvaliteta i ima kvantiteta u izvještaju. To zaboravljaš, a uhvatio si se za ovo što boli. To što sam rekao nisam izmislio, vjeruj mi. Nisam te optužio ni za što, nego samo kažem da je zloupotrijebljeno nešto u datom trenutku i ja sam to povezao čitajući stranu 3 i 4. Toga je puno više bilo prošle godine, a da li je slučajno ili ne ja ne znam. Mladi, lijepi, školovani, radite dobro, imate prostor, sve vam je obezbijeđeno i naravno da trebate da radite i zato ste postavljeni. Ne možeš ti ako si našao 50.000 i potrošiti gdje hoćeš, jer znači da načelnik 1.300.000 može potrošiti gdje hoće, a ne može, valja odgovarati za to. Valja za 10 godina odgovarati za to ako je otišlo negdje gdje nije trebalo. Ti si tako rekao i to me iziritiralo da repliciram.“

Emira Karić, predsjednica kluba vijećnika SDP: „Možda će zvučati prepotentno, ali istinito, ja jesam dijelila promo materijal građanima, ali niti jednom građaninu u Doboj Istoku nisam rekla da glasa za Karić Emiru. Do sada, a da li ću u narednim izborima, ne znam, ali nema tog građanina u Doboj Istoku kojem sam ja rekla da glasa isključivo za mene ili da lobiram za sebe itd. Iza mene stoji nekakav rad koji mi donosi takve i takve rezultate, nekada bolje, nekada gore. Osvrnut ću se vezano za direktora, šta mislite da bih ja gledala, evo staviti ću za primjer direktoricu Senadu koja je prije izbora za dvoranu, ako bi bila u Klokotnici ili Brijesnici Velikoj, daje ovima termine ovoliko, ne šalje novac sa termina na trezor, nego zadržava sebi itd. Itekako bi ovdje reagovala, pogotovo ako bi se to čulo od strane građana, a svi moramo reagovati na takve stvari. Druga stvar, platu u džep i radi šta hoćeš, cvijeće kupuj i to mene ne zanima, jer to je tvoj problem kako ćeš ti lobirati. Ove stvari su itekako škakljive, loši ste učitelji i kada se to dogodi vama tipa ove vlade, neću širiti, onda vas itekako boli.“

Omer Konjić, vijećnik SDA: „Ja ne znam šta nije jasno i kome nije jasno ovo. Preko Centra na općinu Doboj Istok dođe 1.175.000 KM redovnih sredstava i to je redovno, a ovih 80.000 koje svake godine otprilike isto dođu i mi imamo te korisnike koje maltene svakodnevno obilazimo i dijelimo. Evo sutra mi dijelimo 50 paketa u vrijednosti oko 100 KM. Bujrum ako imate neki prijedlog ili ako opet dođu izbori i ako ja budem tu i ako budu ti paketi vi dođite, pa dijelite te pakete i pomozite.“

Hasan Hasančević, predsjednik kluba vijećnika SDA: „Drago mi je samo što je kolegica rekla tipa ove vlade i to je to o čemu ja pričam. Kada ste vi na vlasti možete raditi, a kada su drugi ne može, aferimi su tu.“

Selmin Karić, predsjedavajući Općinskog vijeća: „Sve ustanove rade i prije izbora i u toku i poslije izbora i kako će neko to shvatiti, to je njegov problem. Zaključujem ovu tačku i dajem na izjašnjavanje. Ko je za usvajanje Izvještaja o radu JU Centar za socijalni rad Doboj Istok za 2020. godinu?

Glasanje: ZA – 11, PROTIV – 0, SUZDRŽANIH – 5

Tačka je dobila potrebnu većinu.“

Ad.10. Razmatranje i usvajanje Izvještaja o radu Općinske izborne komisije Doboj Istok za 2020. godinu.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Moram zaista izaći povodom ove tačke dnevnog reda zato što sam inicirala mnoge, možda čak i sukobe kada su bili prijašnji izvještaji od strane OIK-a, a moram reći da se to konkretno odnosilo na opće izbore koji nisu bili u tom trenutku provedeni po meni na pravilan način gdje je bilo mnogo mnogo propusta itd. Ja bih se osvrnula na ove lokalne izbore, bar što se tiče konkretno, jer sam bila taj dan a ostale sam priče čula, da su dobro provedeni izbori ako ćemo ovaj izvještaj gledati samo sa strane provođenja izbora. Moramo staviti ruku na srce to su opet lokalni izbori zaista su lakši, posmatrači su sada na druge načine educirani. Ja se bojim ponovo 2022. godine i čestitam još jedanput i predsjedniku i zamjeniku i želim dobro organizirane izbore 2022. godine i da se ne ponovi onaj izborni ciklus gdje je bilo maltretiranje i posmatrača i članova itd. Tako da ću podržati ovaj izvještaj Općinske izborne komisije, jer kažem kada je fer, fer je. Pratila sam i u drugim mjesnim zajednicama kaže jako malo, međutim dobro su se snalazili, dosta je bilo glasača gdje se moralo izaći i glasati, odnosno gdje se glasalo u autu. Nije se proces brkao u svemu tome, tako da mogu reći ne visoka ocjena, ali jedna dobra ocjena koja je za podržati ovaj izvještaj.“

Izet Hodžić, zamjenik predsjedavajućeg Općinskog vijeća: „Pod ovom tačkom dnevnog reda osjećam potrebu da kažem sljedeće ne da pohvaljujem izvještaj i da pohvaljujem rad nego da iznesem činjenicu da je predsjednik i članovi Općinske izborne komisije radili svoj posao koji im je propisan zakonom. Znači što se tiče općinskih izbora od 15.11. radili su baš onako kako su trebali u skladu sa zakonskim propisima. Želim da im čestitam, jer su taj svoj rad prenijeli na predsjednike i članove biračkih odbora u biračkim mjestima. Imam informaciju, a bio sam u toku kakva je problematika u drugim općinama i gradovima na nivou Tuzlanskog kantona odgovorno tvrdim i kažem vam da što se tiče pripreme i samog spovođenja i informisanja što se tiče ovih izbora, ono što ja znam, neću reći da znam sve, da je izborni proces na području općine Doboj Istok protekao u stvarno zadovoljavajućem obliku. Nismo imali nekih značajnijih primjedbi ni nevladnog sektora koji nadgledaju izbore, a ni političkih subjekata koji su bili učesnici samog izbornog procesa. Čestitke još jedanput predsjedniku i članovima Općinske izborne komisije na urađenom poslu.“

Hasan Hasančević, predsjednik kluba vijećnika SDA: „Obzirom da sam bio predsjednik izbornog štaba u Mjesnoj zajednici Klokočnica smatramo da su najbolje sprovedeni izbori do sada odrađeni na lokalnom nivou ovi zadnji. Znači daleko najorganizovanije. Mi iz stranaka treba da razmišljamo dublje, uzmemo pa pripremamo i tamo brijemo članove biračkih odbora, a tamo treba poslati smirene ljude koji će završiti posao i koji neće praviti tenzije. Zato molim da ubuduće ako ko od nas bude imao uticaja da šalje biračke odbore prema Općinskoj izbornoj komisiji i da tamo šalje karakterne ljude i ljude koji treba da shvate šta treba da završe. Na njih se često vrše pritisci tipa oni su lopovi, oni nisu lopovi, ubacuje se doza sumnje i tada se prave problemi. Po pitanju posmatrača isto tako. Svi mi u političkim strankama vršimo edukaciju svojih kadrova kada su izbori u pitanju. Međutim često ne gledamo kakvog karaktera su ti ljudi i jednostavno tamo dolazi do incidenata koje prave. Znači mi ih poslali i za neke sitnice koje ne bi trebale uopšte da budu bitne ispadne incident. Zahvaljujem se predsjedniku na ukupnom dosadašnjem radu u Izornoj komisiji, a novoizabranim želim da makar dostignu njegov nivo, jer i ja imam dosta iskustva sa tim i dosta obuke tako da je on veoma dobro i korektno odrađivao svoj dio posla.“

Haris Sinanović, vijećnik SDP: „Vezano za budućeg predsjednika i člana Izborne komisije ne umanjujući sve ove dobre stvari koje su kolege iznijele i ne želim reći da nije rađeno sve po zakonu, međutim bilo je nekih stvari koje nisu bile transparentne što se tiče ovih lokalnih izbora. Općinska izborna komisija nije se odnosila prema svim strankama srazmjerno. Igram slučaja ja sam predstavljao svoju političku partiju pa sam imao kontakt, ali navest ću jedan primjer. Kandidat iz SDP koji je osvojio određen broj glasova i primjećeno je da Općinska izborna komisija ono veče kada je unosila podatke unijela 40 glasova manje. Ja sam sutradan reagovao,

zvao telefonom ako treba neki dopis i meni je potvrđeno da je došlo do tehničke greške, što je sasvim normalno da ljudi griješe, jer je onaj koji je unosio podataka umjesto 180 unio 140. Meni je fino rečeno da je poslat zahtjev, pošto nisu više ovdje i nisu mogli ispraviti, u Centralnu izbornu komisiju da se greška ispravi. Iz dana u dan posmatrajući rezultate glasova do zadnjeg dana je meni obećavano da će biti ta greška ispravljena. Taj kandidat je na mene vršio pritisak, a imao je pravo, jer je utvrđeno da je došlo do tehničke greške. Onda neki dopisi koji su namjerno skrivani, pa u zadnji momenat slati što se tiče nekih izmjena. Ovo sam rekao samo u kontekstu za ubuduće za novog predsjednika i novog člana komisije da se ne bi te stvari događale.“

Selmin Karić, predsjedavajući Općinskog vijeća: „Nema više prijavljenih. Zaključujem tačku i dajem na izjašnjavanje. Ko je za usvajanje Izvještaja o radu Općinske izborne komisije Doboj Istok za 2020. godinu?

Glasanje: ZA – 15, PROTIV – 0, SUZDRŽANIH – 1.

Ad.11. Razmatranje i usvajanje prijedloga Rješenja o konačnom imenovanju predsjednika i članova Upravnog odbora Javne ustanove za predškolski odgoj i obrazovanje „Dječija radost“ Doboj Istok.

Selmin Karić, predsjedavajući Općinskog vijeća: „ Imate stav Komisije za dodjelu općinskih priznanja, izbor i imenovanja. Tačku dajem na diskusiju. Ima li prijavljenih? Nema. Ko je za usvajanje prijedloga Rješenja o konačnom imenovanju predsjednika i članova Upravnog odbora Javne ustanove za predškolski odgoj i obrazovanje „Dječija radost“ Doboj Istok?“

Glasanje: ZA – 16, PROTIV – 0, SUZDRŽANIH – 0

Ad.12. Razmatranje i usvajanje prijedloga Rješenja o konačnom imenovanju predsjednika i članova Upravnog odbora Javne ustanove « Centar za socijalni rad Doboj Istok »

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „Ovo se pitanje odnosi na sekretara Omera samo da mi pojasni tačku pravilnika ili ne znam čega gdje uposlenik može biti član ispred reda osnivača. Kod nekih ustanova izričito ne može, pa mi ovdje malo dolazi do nelogičnosti iako bih ja izbjegla takve stvari i nekog drugog kandidovala, jer ipak dva iz reda zaposlenika u upravnom odboru nije da nije pravilno, jer kažete da jeste pravilno, ali to ispade kadija te tuži, kadija ti sudi.“

Selmin Karić, predsjedavajući Općinskog vijeća: „Imali smo slučajeve i u školama i u zdravstvenim institucijama i u svim ustanovama toga ima, ali ako treba pojašnjenje, Omere.“

Omer Hadžić, sekretar Općine: „Zakon je rekao strukturu upravnog i nadzornog odbora i mi smo propisali uslove za to i ko ispunjava uslove može biti imenovan. Ovdje nigdje nije rečeno da taj i taj ne može, kao što je rečeno da direktor ne može biti član upravnog odbora, ne možeš mu naći razloga za isključenje i faktički on se može imenovati.“

Emira Karić, predsjednica kluba vijećnika SDP: „Smatram da bi te stvari trebalo poraditi u zakonu u pravilnicima itd. Ako nema onda bi po meni ljudski trebalo izbjeći takve stvari, jer znači u jednom školskom odboru u mojoj školi može biti pet nastavnika ispred reda dva osnivača, ispred reda roditelja a to po meni nije korektno.“

Hasan Hasančević, predsjednik kluba vijećnika SDA: „ Baška je što nije korektno. U osnovnim i srednjim školama ispred vijeća roditelja može biti uposlenik koji ima dijete koje ide u ustanovu. Završena priča. Ne možeš mu ne dati. Da li je korektno ili nije i dva plus uposlenika to je tri od

pet i završeno. Tapija. Kada nama paše opet se vraćam kada ja imenujem i postavljam može, a kada imenuje kanton ne može ili kontra. Znači nije korektno sa vaše strane.“

Selmin Karić, predsjedavajući Općinskog vijeća: „ Ima li prijavljenih? Nema. Zaključujem raspravu. Ko je za usvajanje prijedloga Rješenja o konačnom imenovanju predsjednika i članova Upravnog odbora Javne ustanove « Centar za socijalni rad Doboj Istok »?“

Glasanje: ZA – 16, PROTIV – 0, SUZDRŽANIH – 0

Ad.13. Razmatranje i usvajanje prijedloga Rješenja o prijedlogu za imenovanje članova Nadzornog odbora Javnog komunalnog preduzeća „Čisto“ doo Doboj Istok.

Selmin Karić, predsjedavajući Općinskog vijeća: „ Tačku dajem na diskusiju. Ovdje se radi o prijedlogu s obzirom da konačno imenovanje vrši skupština društva. Ima li prijavljenih? Nema. Zaključujem tačku. Ko je za prijedlog Rješenja o prijedlogu za imenovanje članova Nadzornog odbora Javnog komunalnog preduzeća „Čisto“ doo Doboj Istok?“

Glasanje: ZA – 16, PROTIV – 0, SUZDRŽANIH – 0

Ad.14. Razmatranje i usvajanje prijedloga Rješenja o prijedlogu za imenovanje članova Nadzornog odbora Javnog preduzeća „Veterinarska stanica“ doo Doboj Istok

Selmin Karić, predsjedavajući Općinskog vijeća: „ Isti slučaj mi donosimo rješenje o prijedlogu za imenovanje, a skupština društva donosi konačno. Ko je za?“

Glasanje: ZA – 16, PROTIV – 0, SUZDRŽANIH – 0

Hasan Hasančević, predsjednik kluba vijećnika SDA: „ Samo da kažem za komisije. Imali smo problem na Selminovoj komisiji da nema vijećnika, evo Meho je rekao da je bio bolestan. Imamo mi stalni problem, jer nema spoljnih saradnika, pa na političkim strankama provjerite ako ljudi ne mogu dolaziti da ih zamjenimo. U redu je kada je tri, ali nekada nemamo kvoruma i džaba dolazimo, a ne plaća se.“

Selmin Karić, predsjedavajući Općinskog vijeća: „ Zahvaljujem se kolega. Zključujem današnju sjednicu Općinskog vijeća i zahvaljujem vam se na prisustvu.“

Sjednica je završena u 12,30 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVALJUĆI
OPĆINSKOG VIJEĆA
Selmin Karić

Službena zabilješka:

Zapisnik je usvojen na 7. redovnoj sjednici Općinskog vijeća Doboj Istok održanoj dana 27.05.2021. godine.

U Klokotnici, dana 28.05.2021. godine

Zabilješku sačinio
Omer Hadžić, sekretar Općine